


特別
N 5
3537
45



100
100
100



特

門 九 5
號 3537
卷 45

重修揚州府志卷之六十七

事略志三

宋上

建隆元年九月淮南節度李重進以揚州叛遣石守信等討之冬十月丁亥詔親征揚州十一月師次揚州城拔之重進盡室自焚

宋史太祖紀一

重進周太祖之甥始與太祖俱事周室心憚太祖太祖即位陰有叛志太祖以鐵券賜之重進欲入朝為左右所惑又自以周室近親遂反遣人求援於李景景懼不納太祖親征師次大儀頓石守信遣使言曰



揚州破在旦夕願陛下臨視太祖徑至城下即日拔

之東都事略重進本傳

命諸軍習戰艦於迎鑾宋史太祖紀一

已酉振揚州城中民人米一斛十歲以下者米半斛隸

為軍者賜衣履遣還庚戌給攻城役夫死者又絹三匹

復三年同上

南唐主遣使來犒師遣其子從鑑來朝十二月己巳駕

還同上

二年春正月戊申以揚州行宮為建隆寺同上

乾德二年八月庚申以迎鑾鎮為建安軍李燾續資治通鑑長編五

開寶三年八月丁亥移建安軍權貨務於揚州長編十一

建安軍宋史邊珣傳作永安軍當是史誤

四年六月丙子升揚州高郵縣為高郵軍長編十二

八年二月知揚州侯陟敗江南軍於宣化鎮宋史太祖紀三

陟以所部敗南唐軍千人於宣化城俄為部下所訟

追赴闕陟度理窮乃求哀盧多遜為其畫計時江表

未拔太祖方議休兵陟從揚州來知金陵危甚多遜

令上急變求見言南唐危在朝夕陛下柰何欲班師

上屏左右問狀遂寢前議並赦陟罪宋史陟本傳案是年南唐亡

距揚行密開國揚州凡八十四年

太宗至道二年十一月禁淮南通行鹽稅 宋史太宗紀二

三年五月壬申罷江淮發運使諸路轉運使司承受公

事朝臣使臣悉召歸闕 長編四十一

國初以轉運使領諸路事淮南分為兩路是歲始定

為十五路六日淮南路 長編四十二

真宗咸平三年八月戊辰鹽鐵判官制置江淮荆浙茶

鹽礬王子與兼統淮南轉運使 長編四十七

至道末罷發運使及子與兼淮南轉運使尋加都大

而不立使名 長編四十八 注云景德三年二月仍復使名

景德二年八月丙戌遣內臣奉安太祖聖容於揚州建

隆寺 宋史真宗紀二

十一月癸亥曹國公元儼進封廣陵郡王 同上

大中祥符元年十二月甲辰詔江淮發運轉運司部內

各留三年之儲以備水旱先是江淮米悉運送京師至

是司天監言揚楚之分當水旱為沴防患故也 長編七十七

辛丑廣陵郡王元儼進封榮王 宋史真宗紀二

二年夏四月壬辰江淮發運使李溥言糧綱卒隨行有

少物貨經歷州縣悉收稅算望與蠲免從之 長編七十一

高郵軍新開湖水散漫多風濤溥令漕舟東下者還

過泗州因載石輪湖中積為長隄自是舟行無患 宋史

溥本傳 案溥為發運使宋史言其既專且貪寢為不法今從節錄

三年八月戊辰詔揚州長吏兼安撫使宋史真宗紀二

九月庚辰知揚州許逖請令兩浙路權罷和雇船所冀行商得載糧斛以濟活旱民從之長編七十四

已亥江淮發運使李溥言今春運米諸路各留三年支

用淮南留三百三十萬石外有上供五十七萬石留備

賑糶兩浙有米百五十萬石上供外有九十一萬石備

淮南賑糶同上

甲辰丙出綏撫十六條頒江淮南安撫使宋史真宗紀二 長編作

十二條

五年五月戊辰朔上以江淮兩浙路稍旱即水田不登

乃遣使就福建取占城稻三萬斛分給三路令擇民田

之高仰者蒔之蓋旱稻也仍出種法付轉運使揭榜諭

民長編七十七

八月鑄玉清昭應宮正殿聖像令江淮發運使李溥訪

巧匠得杭州民張文昱等就建安軍西北小山置冶溥

領視之長編七十八 案此事宏簡錄載在是年十月據長編八月已有瑞異知非十月矣月日無攷

姑次於此

丙午溥奏道場有神雀異光慶雲之瑞詔修宮使丁謂

馳往醮謝宴犒官吏將校耆老賜役夫緡錢溥與謂相

為表裏多載奇木怪石盡括東南巧匠以附會帝意上同

庚戌淮南旱減運河水灌民田仍寬租限州縣不能存

恤致民流亡者罪之宋史真宗紀三

乙卯遣使治揚州回鑾寺奉安太祖神御先是設殿於

其偏始改從正位焉長編七十八

冬十月辛巳建安軍鑄聖像龍見雲中宋史真宗紀三

六年三月乙卯建安軍鑄玉皇聖祖太祖太宗尊像成

以丁謂為迎奉使李宗諤副之淮南江浙荆湖都大發

運使李溥為都監長編八十

先是丁謂等自建安軍奉玉皇聖祖太祖太宗四像

各御大舟迎奉使副分侍玉皇聖祖都監於太祖太

宗舟檢校舟上設幄殿皆有內侍主供具夾岸黃麾

仗二千五百人鼓吹三百人別列舟十艘載門旗青

衣弓矢戈叉道眾幢節所過州縣道門聲讚鼓吹振

作官吏出城十里具道釋威儀音樂迎拜所過禁屠

宰七日止行刑二日遣迎奉大禮使王旦詣應天府

酌獻奏青詞宗室至故驛羣臣至通津門奉迎同上

五月甲辰聖像至玉清昭應宮丙午曲赦京城建安軍

揚州高郵軍楚泗宿州死罪囚降一等流以下釋之

升建安軍為真州鎔範聖像之地特建為儀真觀真州

放今年夏稅十之三屋稅十之二淮南災傷處去年秋稅並蠲之同上

辛亥升真州為上州同上

十一月癸卯罷淮南和糴以頻年薄稔今始有秋故也長編八十一

七年三月甲辰免揚州建隆寺田租長編八十二

六月辛酉罷揚楚州高郵軍屯兵先是以宣武軍分戍淮南至是軍中有不逞輩謀殺校長轉運使請省去之故也長編八十二

冬十月丁巳詔揚州長吏正至朔望朝拜建隆寺太祖神御殿長編八十三

八年二月乙亥詔淮南路廩粟為糜粥以濟民饑遣兵戍揚州警盜也長編八十四

九年八月丙子令江淮發運司留上供米五十萬以備饑年宋史真宗紀三

天禧元年五月乙卯以高郵軍民苟懷玉為本軍助教以其出米麥三千斛濟饑民故也仍詔自今為例長編八十九

六月庚辰發運使言真州等處轉般倉及浙江上供米二百二十餘萬斛欲留逐處以濟闕乏從之長編九十

三年六月癸未浚淮南漕渠廢三堰宋史真宗紀三

王臻為淮南轉運副使時發運司議濬漕渠廢諸堰

臻言揚州召伯堰實謝安為之人思其功不可廢也

濬渠亦無所益召為三司度支判官而發運司卒濬

渠以通漕臻坐前異議降監察御史知睦州宋史臻本傳

四年春正月丙寅開揚州運河宋史真宗紀三

仁宗天聖三年六月丙寅發運副使張綸請開真州長

蘆口為河屬之江以免舟楫漂失之患詔從之長編一百三

四年閏月減江淮發運司歲漕止六百萬石東都事略本紀五

八月丁亥築泰州捍海堰宋史仁宗紀一

先是堰久廢不治歲患海濤冒民田監西溪鹽稅范

仲淹言於發運副使張綸請修復之綸奏以仲淹知

興化縣總其役議者謂濤患息則積潦必為災綸曰

濤之患十九而潦之災十二獲多亡少豈不可乎役

既興會大雨雪驚濤且至役夫死者百餘人眾譁言

堰不可復詔遣中使案視將罷之又詔淮南轉運使

胡令儀同仲淹度其可否令儀力主仲淹議仲淹尋

以憂去乃命綸兼權知泰州築堰自小海寨東南至

耿莊凡一百八十里而於運河置牐納潮水以通漕

逾年堰成流通歸者二千六百餘戶范文正公年譜

七年閏二月甲辰揚州召伯牖成長編一百七先是發運使鍾離瑾請置

景祐元年六月巳丑朔賜揚州學田五頃長編一百十四

冬十月庚申罷淮南江浙荆湖制置發運使仍詔淮南轉運使兼領發運使司事其制置茶鹽礬稅各歸逐路

轉運司長編一百十五

二年十一月乙巳荆王元儼為荆南淮南節度大使行

荆州揚州牧仍賜入朝不趨二州牧自元儼始長編一百十七

三年五月戊戌許真州立學仍給田五頃長編一百十八

九月辛卯詔淮南轉運使歲一詣闕奏事先是罷發運使及歲入奏計至是復之長編一百十九

四年六月奉安太祖御容於揚州建隆寺宋史仁宗紀二

景德中嘗即寺置殿繪御容而其制庖陋會占者言東南有王氣乃易以塑像更命新殿曰章武長編一百二十

寶元元年八月丁卯復淮南江浙荆湖制置發運使宋史

仁宗紀二

康定元年十一月乙卯淮南江浙荆湖制置發運使張錫言沿江淮兩岸同巡檢縣尉舊皆中流為界自今請

令通管江淮捕賊公事從之長編一百二十九

慶厯三年沂州軍賊王倫等劫沂密海揚泗楚等州邀

呼官吏公取器甲橫行淮海至高郵已二三百人皆面刺天降聖捷指揮字號

歐陽文忠公集

盜起淮南知高郵軍晁仲約度不能禦諭軍中富民出金帛具牛酒迎勞且厚遺之賊悅徑去事聞富弼在樞府欲誅之以正軍法仲淹欲宥之弼曰盜賊公行守臣不能戰又不能守而使民醵錢遺之法所當誅也仲淹曰郡縣兵械足以戰守遇賊不禦而又賂之法所當誅也今高郵無兵無械雖仲約之義當勉力戰守然事有可恕戮之非法意也仁宗從之仲約由此免死

東都事略范仲淹傳案蔡忠惠公集云軍賊王倫纒過百人高郵軍晁仲約以身

迎候范文正公集云劫盜張海橫行數路將過高郵知軍晁仲約度不能禦使人迎勞且厚遺之此當是一事海蓋王倫之黨故宋史止言倫叛也

皇祐三年春正月丙子詔揚州帶提轄本路兵甲賊盜公事益屯禁兵仍分淮南為兩路揚州為東路廬州為

西路

長編一百七十

四年十一月辛亥詔真楚泗知州自今令制置發運司連狀保舉知職事修飭代還當除提點刑獄

長編一百七十三

嘉祐四年五月丁巳詔淮南東西路兼兵馬鈐轄就置禁軍選嘗歷任武臣二員為兵馬都監並置公廨於本

州以專訓練

長編一百八十九時與江南等路同置

神宗熙寧四年十一月壬午詔江淮發運使舉官毋得

過本路轉運使副所舉之數

長編二百二十八

壬寅開洪澤河達於淮以便舟楫

同上注云五年正月丁酉河成

江淮等路發運副使皮公弼言漕運涉淮有風波之

險乞開洪澤河六十里稍避其害詔委公弼提舉功

畢人以爲便

長編二百二十九

五年五月廢高郵軍爲縣隸揚州

長編二百三十三

閏七月詔以京東見管軍馬戍揚

長編二百三十六先是詔以京東武衛

兵四十二指揮屬河北路而議者復以東南兵少盜賊可虞故又詔於京東見管軍馬內以三千人分成揚杭

寧江

九月詔淮南分東西路

宋史神宗紀二今揚州皆屬東路案

六年秋七月詔淮南路置鑄錢監

同上

十二月甲辰詔淮南東路轉運司募闕食貧民興修揚

州江都高郵天長界河及古鹽河

長編二百四十八

七年夏四月己卯詔賜淮南東路轉運司上供糧五萬

石於災傷州縣募夫修工役

長編二百五十二

六月癸酉詔眞揚楚州運河依兩浙運河擇尤淺澀處

先閉淘令發運轉運司借上供錢米雇夫

長編二百五十四

八月己巳詔淮南東路災傷州軍巡檢縣尉令本路監

司不拘常制奏舉候豐歲如舊

長編二百五十五

八年七月己巳淮南發運司言自五月不雨運鹽河皆不通舟船詔開浚聽留上供錢米給其費仍遣都水監官督視長編二百六十六

八月丙申詔發運司體實淮南江東兩浙米價州縣所存上供米毋過百萬石減直予民斗錢勿過八十宋史神宗

九年正月判都水監工部郎中侯叔獻開揚州陳公塘

長編二百七十二 時以漕河不通 鹽綱留滯委叔獻相度引注溝河

三月丁丑命權江淮等路發運副使盧秉兼權管勾真

揚通泰等開運河長編二百七十三 時以侯叔獻督役感疾令秉攝事

元豐二年八月戊申詔浚淮南運河自邵伯堰至真州

長編二百九十九

三年四月庚子賜江淮發運使度牒三百給真楚泗州

修轉般倉運河水牖之費長編三百三

四年二月己卯詔東南諸路團給諸軍為十三將淮南

東路第一長編三百一十一

十一月己亥淮南東路提點刑獄范鏗言見權領揚州

高麗使經過臣官輕服微已牒權轉運副使李琮權州

詔范鏗借朝奉大夫賜金紫長編三百十九 先是判

過境臣班視二府不可為陪臣 應天府張方平奏高麗使 屈詔止令通判接送揚州依此

八年三月雍王顥進封揚王

宋史哲宗紀一

哲宗元祐元年二月辛酉新淮南等路提點坑冶鑄錢

事李深言坑冶鑄錢舊隸一司至元豐二年以荆廣淮

浙分爲兩路韶州岑水等場自去年以來坑冶不發欲

乞兩路提點鑄錢通爲一司從之每路特借錢一十五

萬貫

長編三百六十五

戊子詔淮南路留管勾文字管勾帳司官各一員淮南

發運司準備差遣點勘文字留勾當公事管勾文字糴

糴官各一員

長編三百六十七 時詔諸路各據合留員數選留餘並罷

三月壬戌詔諸路提點刑獄不分路淮南西路淮南東

路並爲淮南路

長編三百七十一

夏四月辛丑復揚州高郵縣爲高郵軍

長編三百七十五

二年五月丁巳中書省言淮南舊分東西兩路每路置

提點刑獄官一員近已併路以二員共領州縣濶遠遇

有盜賊刑獄公事公移稽滯督捕巡察不得專一詔分

路差官及逐司差官檢法仍舊制

長編四百

三年八月進封揚王顥爲徐王

宋史哲宗紀一

冬十月乙亥詔發運使副兼制置鹽礬茶事

長編四百十五

七年春正月丁未詔通泰州捍海兵士諸處不得勾抽

雖有朝旨差出亦令本州執奏特許存留

長編四百六十九

元符二年二月己卯罷真揚楚泗監倉門斗面官四員

置巡轄綱運官四員長編五 百六

九月丙辰荆湖淮浙發運司言真揚通泰楚海州高郵

軍界運河淺澀請令逐州軍通簽判兼管內運河從之

長編五 百十五

徽宗建中靖國元年六月甲寅封吳王顥子孝騫為廣

陵郡王宋史徽宗紀一

大觀元年十二月癸巳以揚為帥府宋史徽宗紀二

宣和三年春正月詔淮南權添置武臣提刑一員宋史徽宗紀

四紀

欽宗靖康元年正月太上道君皇帝渡揚子江至鎮江

府靖康要錄一

九月戊寅李綱罷知揚州十月貶綱為保靜軍節度副

使安置建昌軍宋史欽宗紀

言者論綱專主戰議喪師費財罷揚州舍人劉珪當

制謂綱勇於報國侍郎馮澥言珪為綱游說珪坐貶

王宗沐續資治通鑑宋紀二十六

高宗建炎元年五月壬寅以江淮發運使梁揚祖提領

東南茶鹽事宋史高宗紀一

時東北道梗鹽筴不通揚祖奏真州東南水陸要衝

宜遣官置司給賣鈔引所有茶鹽錢並充朝廷封樁

諸司毋得移用故有是命

畢沅續資治通鑑宋紀九十八

丁巳詔揚州儲資糧修城壘以備巡幸

宋史高宗紀一

六月己卯李綱請沿河淮江置帥府沿淮帥府二治揚

廬從之

畢沅續鑑宋紀九十八案徽宗紀大觀元年已以揚州為帥府此殆更其軍制故又及之

七月丙午帝從汪伯彥黃潛善言將幸揚州以避敵詔

副都指揮使郭仲荀奉太后先行六宮及衛士家屬皆

從

王宗沐續鑑宋紀二十八

八月戊午徙諸宗室於江淮以避敵願留京師者聽之

又移南外宗正司於鎮江府西外於揚州

李心傳建炎以來繫年要

八錄

己巳命江淮發運副使李祐自南京至真州躬督糧運

及現在金帛赴行在

同上

壬申詔真州守臣以禮敦遣長蘆隱士張自牧赴行在

同上

九月甲午命揚州守臣呂頤浩繕修城池丁酉詔荆襄

關陝江淮皆備巡幸

宋史高宗紀一

呂頤浩字元直齊州人高宗卽位除揚州車駕南

幸頤浩入見除戶部侍郎兼知揚州進戶部尚書劇

賊張遇眾數萬屯金山縱兵焚掠頤浩單騎與韓世

忠造其壘說之以逆順遇黨釋甲降進吏部尚書建
炎二年金人逼揚州車駕南渡鎮江召從臣問去留
頤浩叩頭願且留此為江北聲援不然敵乘勢渡江
事愈急矣駕幸錢塘拜同僉書樞密院事江淮兩浙
制置使還屯京口金人去揚州改江東安撫制置使

宋史頤浩本傳

壬寅遣徽猷閣待制孟忠厚迎奉太廟神主赴揚州宋史

高宗紀一

甲寅上巡幸江都自應天府進發徐夢莘三朝北盟會編一百十三

乙卯盜趙萬犯鎮江知府趙子崧遁係瓜州王宗沐續編宋紀二

八

冬十月丁巳朔帝登舟幸淮甸戊午太后至揚州宋史高宗

紀一

初太后過高郵聞叛兵焚鎮江乃遣兵扼瓜州渡及
是入城駐於州治名州之正衙曰車駕巡幸駐蹕之

繫年要錄十案北盟會門編載此事在九月戊申

已卯次楚州寶應縣後軍將孫琦等作亂逼左正言盧

臣中墮水死宋史高宗紀一

御營後軍作亂琦為之首臣中從駕不及立船艎叱
賊為所逼墜水死上命求臣中所在得之水中拱立

如故殿中侍御史張浚以雖在艱難中豈可廢法乃
劾統制官定國軍承宣使韓世忠師行無紀士卒為
變詔士卒罰金舍人劉珪言無以懲後浚再上章論
且乞擒捕為變者乃降世忠觀察使上下聳然始知
有國法又詔臣中知無不言而死於非橫特贈左諫

議大夫賜其家銀帛官子孫二人繫年要錄十

癸未上至揚州駐蹕州治舊制三衙管軍未嘗內宿至
是始日輪一員直宿行宮同

十一月丁亥上以揚州路滑始聽百官乘轎同

丙申曲赦南京宿亳泗楚揚州高郵軍以上巡幸所嘗

過也同

二年春正月丙戌朔帝在揚州宋史高宗紀二

壬辰詔并真州權貨務都茶場於揚州以行在務場為

名繫年要錄十二

甲午詣壽寧寺謁祖宗神主宋史高宗紀二

移揚州宗室於泰州高郵軍命祕閣修撰趙令憲知兩

外宗正事主管泰州宗子泺州防禦使士從添差同知

西外宗正事主管高郵軍宗子繫年要錄十二

己亥張遇焚真州祕閣修撰孫昭遠為亂兵所害宋史高宗

紀二 案熊克中興小記 云羣盜有張遇號一窩蜂

事略三

其

初遇自黃州引軍東下遂犯江寧江淮制置使劉光世追擊之遇乃以舟數百絕江而南將犯京口既而回泊真州士民皆潰將作監主簿馬元穎妻榮氏爲賊所得厲聲罵賊爲所害翼日遇自真州攻陷鎮江時金人攻掠陝西京東諸郡而羣盜起山東黃潛善汪伯彥皆蔽匿不以奏及遇焚真州去行在六十里上亦不聞繫年要錄十二

辛亥兩浙制置使王淵招賊張遇降之同上

遇自金山寺進屯楊子橋眾號二萬會淵還行在自將數百騎入其砦招之遇見淵器械精明惶懼迎拜

淵曰汝等賴我來晚故得降不然已無遺類矣淵奏

以遇爲閤門宣贊舍人遇猶縱兵四劫扈從者危懼知揚州呂頤浩前軍統制韓世忠聯騎造其壘曉以逆順禍福執其謀主劉彥磔於楊子橋縛小校二十九人送淵戮之餘黨怖而釋甲得其軍萬人隸世忠

同上 案宋史韓世忠傳以斬劉彥事屬之李民降後與此不同疑史誤

三月辛亥以范瓊權同主管侍衛步軍司公事屯真州

宋史高宗紀二

八月甲戌上策諸道正奏名進士於集英殿同上

庚辰詔東京所屬官司般發祭器大樂朝祭服儀仗法

物赴行在時上將祀天南郊命有司築壇於揚州南門內江都縣之東南而從行無器仗故取之舊都焉繫年要錄

七十

九月甲申京城外巡檢使丁進叛率眾寇淮西進初受宗澤招澤薨乃去時韓世忠軍中有進餘黨百餘人世忠盡斬於揚州竹西亭斬至王權有武臣段思者勸世忠釋而用之尋命御營右軍副統制劉正彥以所部收

進

同上世忠傳詳後

庚寅上御集英殿賜諸路類省試正奏名進士李易等四百五十一人及第出身同出身而川陝河北京東正奏名進士一百四人以道梗不能赴皆卽家賜第特奏

名張鴻舉下至五等皆許調官鴻舉以龍飛恩特附第

二甲易江都人鴻舉邵武人也同上

丁酉賜新及第進士錢千七百緡爲期集費自是以爲

故事李易等以上憂勞辭聞喜宴同上

冬十月甲寅命揚州浚隍修城閱江淮州郡水軍宋史高宗

紀

戊午遣劉光世討李成同上

李成敗獲其黨之家屬詔分養於真秦楚三州光世

具上男女六百餘人畢沅續鑑宋紀一百二

十一月己丑江淮制置使劉光世還行在帝謂宰執曰
昨於光世處得成所用提刀一重七斤成能左右手運
兩刀所向無前惜惑於陶子思邪說使朕不得用之是
日光世俘子思詣都堂以火然於開明橋上其軍士降
者皆釋之同上

庚子詣壽寧寺朝饗祖宗神主宋史高宗紀二

壬寅就江都縣築壇南郊大赦天下北盟會編一百十九

京東賊李民詣行在請降王淵殲其眾留民為將宋史高宗

紀

十一月戊寅以禮部侍郎張浚兼參贊軍事教習長兵

傳詳後

時金人橫行山東羣盜李成輩因之為亂金左副元

帥宗維畢沅續鑑自東平歷徐泗以趣行在而黃潛

善汪伯彥皆無遠略且斥堠不明未嘗多以金繒使

人伺金之動息於是淮北累有警報潛善等謂成餘

黨無足畏者金諜知朝廷不戒亦偽稱成黨以款我

師上以邊事未寧詔百官言所見吏部尚書呂頤浩

上備禦十策戶部尚書葉夢得亦請上南巡阻江為

險以備不虞又請以重臣為宣總使一日召諸軍議

事中軍統制官張俊奏敵勢方張宜且南渡復請移

左藏庫於鎮江吏部侍郎劉珪言備敵之計兵食爲先今以降卒爲見兵以糴本爲見糧二者一無可恃維揚城池未修卒有不虞何以待敵不報殿中侍御史張守上防淮渡江利害六事潛善伯彥滋不悅乃請遣守撫諭京城守卽日就道至是聞北京陷議者以爲敵騎且來而廟堂晏然不爲備浚率同列爲執政力言之潛善伯彥笑且不信乃命浚參贊軍事與

頤浩教習河朔長兵

繫年要錄十八

三年春正月庚辰朔帝在揚州

宋史高宗紀二

己丑奉安西京會聖宮累朝御容於壽寧寺

同上

庚子詔百官聞警遣家屬避兵致物情動搖者流

金人破徐州將侵揚州邊報屢至朝廷未有禦之之

策潛善伯彥殊不介意人皆危之有爲避敵之計者

潛善伯彥慮動搖眾心乃禁百官搬家出城市并驚

惶益不安矣

北盟會編一百二十一

丙午御營平寇左將軍韓世忠軍潰於沐陽其將張遇

死金兵執淮陽守臣李寬殺轉運副使李祓以騎兵三

千取彭城間道趣淮甸

宋史高宗紀二

初世忠在淮陽將會山東諸寇以拒金會宗維

畢沅續鑑

翰

兵至滕縣聞世忠扼淮陽恐稽師期乃分東南

道都統領兵萬人趣揚州以議事為名使上不得出而以大軍迎世忠世忠不能當夜引軍歸未曉至宿遷縣不虞金人之踵其後質明覺之奔於沐陽與其帳下謀夜棄軍乘潮走鹽城諸軍遂潰閤門宣贊舍人張遇死於張渠村後軍管隊官李彥先率本隊四十七人得二舟入海聚眾自此輔達聚眾於漣水李在據高郵皆世忠之兵也其餘收散卒自為徒黨者

不可勝計

繫年要錄十九

二月庚戌朔始聽士民從便避兵命劉正彥部兵衛皇于六宮如杭州江淮制置使劉光世阻淮拒金人敵未

至自潰金人犯楚州守臣朱琳降

宋史高宗紀二

上駕御舟泊河岸都人惶怖莫知所為知天長軍楊晟惇奏已拆浮橋始詔士民從便避敵上即欲渡江潛善等請少留俟報且搬左藏庫金帛三分之一上許之戶部侍郎葉夢得即具舟楫從大將假二千人津發一日而畢然公私舟交河中跬步不容進矣夢得復請以戶部所餘物前期支六軍春衣及官吏俸一月亦從之遂命御營統制官劉正彥以所部從六宮皇子往杭州幹辦御藥院陳永錫護皇子又遣呂頤浩張浚往沿淮措置金以數百騎奄至天長軍統

制任重成喜將萬人俱遁亟遣光世迎敵都人謂光世必能禦賊而士無鬥志未至淮即潰繫年要錄二十 金

攻楚州朱琳開西北門納金人開東門縱居人自便

軍民皆趣寶應縣欲自揚州渡江金人覺之悉邀回

城中畢沅續鑑宋紀一百三 是日揚州城內居民爭門以出

踐死者無數從官有詣都堂問二相者潛善伯彥皆

曰已有措置不必慮百官聞此相慰以知事實莫如

宰相今既云爾未可輕動居民亦以為然夜江都縣

火皆戍卒自焚其居繫年要錄二十

壬子內侍鄺詢報金兵至帝被甲馳幸鎮江府是日金

兵過揚子橋宋史高宗紀二

金人破天長軍帝遣內侍覘事知金人至遽奔還帝

得報即介胄走馬出門惟御營都統制王淵侍省

押班康履五六騎隨之過市市人指之曰官家去也

俄有宮人自大內星散而出城中大亂帝與行人並

轡而馳黃潛善汪伯彥方會都堂或有問邊耗者猶

以不足畏告之堂吏呼曰駕行矣二人乃戎服鞭馬

南驚軍民爭門而死者不可勝數帝次揚子橋一衛

士出語不遜上掣手劍殺之時軍民怨黃潛善刻骨

司農卿黃鍰至江上軍士呼曰黃相公在此數之曰

誤國害民皆汝之罪鏐方辨其非而首已斷矣少卿

史徽丞范浩繼至亦死給事中兼侍講黃哲方徒步

一騎士挽弓射之中四矢而卒是日鴻臚少卿黃唐

俊渡江溺死左諫議大夫李處遜為亂兵所殺太府

少卿朱端友監察御史張灝皆不知存亡

畢沅續鑑宋紀一百

二 攷異曰熊克小紀作大理卿黃鏐今據繫年要錄所引日紀作司農卿又日紀稱史徽范浩至常州宜興縣境為盜所害與此不同今從維揚巡幸記又案諸書皆云高宗去揚州在建炎三年二月金史云天會七年五月乙卯拔離速等襲宋主於揚州殆金史誤

癸丑游騎至瓜洲

宋史高宗紀二

呂頤浩張浚聯馬追及上於瓜洲鎮得小舟即乘以

濟次西津口上坐水帝廟取劍就鞞擦血百官皆不

至諸衛禁軍無一人從行者是晚金遊騎至揚州守

臣右文殿修撰黃頥先遁去簽書淮南節度判官吳

某權州事民皆備香花迎拜金人入城問上所在眾

曰渡江矣金人馳往瓜洲望江而回引兵屯摘星樓

下縱火城內烟焰燭天子女金帛殺掠殆盡南陽尉

晏孝廣女有美色為金兵所得欲妻之晏氏即刎縊

求死居彼中二十年卒不能犯金人義之

繫年要錄二十

金人之未至也公私所載舳艫相銜運河自揚州至

瓜洲五十里僅通一舟初城中聞報出城者皆以得

舟爲利及金兵至潮不應燭盡膠泥淖中金兵取之
如拾乘輿服御官府案牘無一存者同上

太常少卿季陵奉太廟神主行金兵追之失太祖神主

宋史高宗紀二

金游騎至瓜洲民未渡者尚十餘萬奔迸墮江而死
者半之舟人乘時射利停橈水中每一人必一金乃
濟此敵至皆相抱沈江或不及者金兵驅而去金帛
珠玉積江岸如山時事出倉卒朝廷儀物悉委棄之
季陵獨奉九廟神主使親事官員以行至瓜洲敵騎
已逼陵舍舟而陸親事官李寶爲敵所驅遂失太祖

神主 繫年要錄二十

金人入真州宋史高宗紀二

初賊靳賽來就招朝廷因以賽統制本部軍馬會邊
報日急乃命賽與統制官王德屯真州及上渡江德
焚真州而去官吏皆散走發運使梁揚祖亦遁賽與
其眾往來於江中繫年要錄二十

甲寅金人揭榜於揚州市西北人願還者聽之去者萬

餘人畢沅續鑑宋紀一百三 案繫年要錄云後爲薛慶軍者是也

乙卯金人去真州靳賽引兵復入城頗肆殺掠後數日
守臣向子恣至以義責之同上

向子恣字宜卿開封人建炎三年呂頤浩委攝真州事馳入卽首治郭吉之叛移檄招集散亡得數百人
有司憂餉不給子恣謂此州昔聚酒貨最繁意務場瓦礫下必有宿藏劓之果得酒百餘斛售以充餉初
吉方暴橫忽率甲士張弓露刃至於庭子恣厲聲曰汝欲害吾何用眾爲吾自斷首付汝因呼候兵授劍
吉氣沮錯愕忽抱劍者曰初無是心特耀兵娛公耳事定朝論偉之會高宗幸鎮江子恣赴行在奏對勞
問甚久命直祕閣還郡後歷知明州以剛直忤權貴被誣落職去士民訟之羣擊鼓於提刑司鼓爲之裂

尋復其官致仕

備徵縣志

丁巳金人犯泰州守臣曾班以城降

宋史高宗紀二

金人自揚州分兵而來班聚軍民議曰金重兵臨城班義不當去相與死守若何眾皆哭曰願以生靈爲念屈節投拜保全一城班遂遣兵馬鈐轄張亢齋降書詣軍前植降旗於城上率軍民迎拜金人入城置酒高會居數日盡掠金帛而去

繫年要錄二十

乙丑金人屯揚州城下遣擐甲執旗者一人入城諭士民期以三日盡出西城過期者殺并數揚人之罪謂留上也民無出城者

同上

張縝金壇人建炎中守揚州金兵進圍城朝廷恐縝

力不能支許退保鎮江縝堅不動弗顧其家後城潰

及妻子皆死之萬姓統譜案縝事諸書未見未知

姓譜何本攷繫年要錄是時守臣黃

願先通節度判官吳某權初冀州雲騎卒孫琪聚

兵為盜號一海鰓劉光世招降之維揚之役行在諸

軍皆潰琪擁光世之妻向氏在軍中由真滁奔淮西

事之如光世琪至廬州帥臣胡舜陟乘城拒守琪引

兵之安豐縣後以向氏歸光世畢沅續鑑宋紀一百三

二 戊辰呂頤浩劉光世移兵屯瓜洲渡與金人對壘繫年要錄

金人焚揚州宋史宗紀二

初金遣甲士數十人北盟會編云此入揚州諭士民

出西城皆疑之未有出者是日又遣人大呼不出者

殺於是西北人自西門出則悉留木柵中惟揚州人

不出夜金縱火焚城士民皆死存者才數千人而已

繫年要錄二十案畢沅續

通鑑改揚州人為東城人誤

庚午金人去揚州宋史高宗紀二

辛未金人過高郵軍守臣趙士瑗棄城走同上

金人自揚還至高郵城下趙士瑗棄城走判官齊志

行率軍縣官出城投拜金人劫掠而去繫年要錄二十

潰兵宋進犯泰州守臣曾班遁

宋史高宗紀二

進初為韓世忠圍人至是更名世雄聚兵二百餘犯

泰州曾班遁去世雄入城縱掠推錢糧官裴淵為首

班坐貶二秩

繫年要錄二十

江淮兩浙制置使呂頤浩聞敵退渡江至真州收權貨

務錢物

同上

壬申呂頤浩遣將陳彥渡江襲金餘兵復揚州

宋史高宗紀二

癸酉韓世忠小校李在叛據高郵

同上

在自沐陽潰散聚徒百餘人居寶應縣會金人棄高

郵去在乃詐稱信王下忠義軍率眾至高郵有監北

較酒務係義郎唐思問先往迎之在既入城遂以其

徒時正臣知高郵軍思問通判軍事執投拜官齊志

行等皆殺之乃遣人截金後軍得金寶數艘故其軍

極富時端明殿學士董耘朝議大夫李奎皆寓居高

郵在因以為參議又聚集潰卒數千遂據高郵

畢沅續鑑

宋紀一 初三既渡江同知西外宗正事士從自高

郵軍招潰卒屯興化縣時淮南東路提點刑獄公事

裴廩薛彥國在一洲上士從招二人為參謀官言於

朝乞假江淮制置使上從之士從聞高郵賊李在往

楚州遣統領官不側乘虛掩襲至嶽廟下遇紅巾百

十皆殺之取其衣偽稱在黨行至草市行伍不整謹
噪殺人在覺之出兵迎敵不側僅以身免

繫年要錄二十一

案不側亦宋宗室事在此月庚寅日

四月薛慶據高郵軍 宋史高紀二

慶初自揚州遁去與其黨椎埋通泰野澤間後同李
在襲取高郵守之在與其次爭事相殘殺眾乃推慶

繫年要錄二十二

金人既還泗州洪澤牖有大小官舟千餘皆不取時淮
陰縣吏孫晟攝行縣事洪澤牖軍羅成等不服遂與其
徒邵青輩率舟船犯淮陰晟避去先是韓世忠潰於沐

陽其後軍將李義者往來寶應之間有眾數百人相約
合兵圍楚州成取綵繒以為帆既而義為邵青所破官
軍追殺之上 同

五月己丑張浚撫諭薛慶於高郵辛丑浚還自高郵 宋史高紀二

慶據高郵有眾數萬浚恐其滋蔓請往招之入慶壘
諭以朝廷恩意慶感服遂降浚留撫其眾或傳浚被
執呂頤浩等請罷浚帝從之越十日浚還帝驚嘆趣
就職 王宗沐續鑑宋紀二十九 是行也御營使司主管機宜文
字承直郎任貺至高郵遇賊墜馬死上命以銀帛

其家錄其子仲全為忠州文學

繫年要錄二十三

七月辛丑王瓚與靳賽遇合戰敗績

宋史高宗紀二先是靳賽已降張

浚

初朝廷以賽為淮東馬步軍副總管屯揚州已而復

叛招撫使王瓚與遇於興化縣瓚軍不整為賽所乘

大敗制書金鼓印文皆為賽所得瓚僅以身免

繫年要錄

二十五

十一月庚申金人陷真州守臣向子恣棄城去

宋史高宗紀二

丁卯杜充引親兵三千絕江而北統制官王進王冠猶

以本部隨之時充在真州寓天慶觀守臣向子恣勸充

自通泰入浙欲與之偕行充有邪謀不聽子恣棄真州

去充命冠知真州自為出降計會劉位兵來援遂北行

繫年要錄二十九

充自真州而北完顏宗弼遣人說充許以中原地封

之如張邦昌故事充遂降敵向子恣以聞上聞之不

食者累日

繫年要錄三十一案充降金事在明年二月

四年五月甲子置淮南路鎮撫使

宋史高宗紀三

乙丑升高郵軍為承州以薛慶為鎮撫使丁卯慶及金

人戰於承州城下累敗之

同上

八月庚辰薛慶及金人戰於揚州城下死之

同上

薛慶起羣盜據高郵兵數萬人多驍雋敢鬪能以少擊眾張浚聞慶無所係屬親往招之慶感服因使守高郵尋遷承州天長鎮撫使金人還自浙屯天長六合間慶率眾劫之得牛數百悉賤估分畀民之力田者金人欲自運河北歸而趙立在楚慶在承扼其衝不得進會兵攻楚州真揚鎮撫郭仲威聞之約慶俱往迎敵慶至揚州仲威殊無行意置酒高會慶怒曰此豈縱酒時邪我為先鋒汝當繼後上馬疾馳去平旦出揚州西門從騎不滿百轉戰十餘里亡騎三人仲威迄不至慶與其下奔揚州仲威閉門拒之慶倉皇墜馬為金追騎所獲馬識舊路還軍中見之曰馬還太尉其死乎金人殺慶承州陷計聞贈保寧軍承宣使賞其家十人封其妻碩人

宋史忠義傳八

仲威棄揚

州奔興化敵長驅犯承州兵馬鈐轄王林出城迎敵不勝亦奔興化承州陷慶在承久軍食既足不復斂取於民王官自京師至者館穀甚厚皆案格賦祿官兵隸承州者月糧時帛如令給之至視其徒則戰十計日糜食老弱受券而已民懷其惠亦賴其捍禦以自固敵假道於承以攻楚慶不聽至是被害

繫年要錄三十

巳丑詔岳飛救楚州

宋史高宗紀三
飛傳詳後

甲午劉九世遣王德鄺瓊以輕兵渡江乙未遇金游騎

於召伯埭敗之

同上

九月壬寅詔光世以所俘赴行在既而德自天長引兵

趣承州不得入斬所部左軍統領官劉鎮而還

繫年要
錄三十

七

辛酉金人犯揚州統制靳賽逆戰於港河敗之

宋史高
宗紀三

冬十月乙未岳飛破金人於承州

同上

丙申詔劉光世節制諸鎮守禦通泰州伺便襲金人過

准同

丁酉知承州王林自興化率餘兵奔通州

繫年要錄
三十八

巳亥通泰鎮撫使岳飛在泰州持法嚴眾不敢犯前軍

統制官傅慶衛州窰戶也有勇力飛愛之慶恃其才視

飛為平交飛無忤色及飛為鎮撫使待之頗異慶不悅

會劉光世遣王德來承州飛命慶以兵會慶與德語云

願事劉公統領官王憲聞其言以告飛至是飛令諸將

射遠慶獨至百七十步既而飛取上所賜戰袍金帶遺

統制官王貴慶醉謂飛曰當賞有功者飛問有功者誰

慶曰慶在清水亭有功飛大怒曰不斬傅慶何以示眾

遂斬之

同上案是年金人再犯常
州飛與戰於清水亭大捷

十一月丙午岳飛棄泰州渡江丁未金人犯泰州飛退
係江陰軍沙上宋史高宗紀三

飛在承州泰州盜起王招寇城東張榮寇城北詔飛
還守通泰乃旋師自白炭村至柴墟屢戰皆捷金虜
勢盛泰州無可恃之險乃渡百姓屯江陰事見岳珂金陀粹編

岳飛字鵬舉相州湯陰人建炎四年遷通泰鎮撫
使兼知泰州飛辭乞淮南東路一重難任使收復本
路州郡乘機漸進使山東河北河東京畿等路次第
而復會金攻楚急詔張俊援之俊辭乃遣飛行而命
劉光世出兵援飛飛屯三塾為楚援尋抵承州三戰

三捷殺高太保俘酋長七十餘人光世等皆不敢前
飛師孤力寡楚遂陷詔飛還守通泰有旨可守即守
如不可但於沙洲保護百姓伺便掩擊飛以泰無險
可恃退保柴墟戰於南霸橋金大敗渡百姓於沙上
飛以精騎二百殿金兵不敢近宋史飛本傳案三塾見元豐九域志或

作三墩誤今北監本作塾南監本亦譌作墩
丙辰金人陷泰州宋史高宗紀三

紹興元年正月己酉金人犯揚州同上

三月壬子朝奉郎通判泰州馬尚就差知泰州招諭軍
民歸業並興鹽場等事繫年要錄四十三

金人攻張榮縮頭湖水砦榮擊敗之來告捷劉光世以

榮知泰州

宋史高宗紀三

先是張榮在通州以地勢不利乃引舟入縮頭湖作水砦以守金右監軍昌在泰州以舟師犯榮水砦榮亦出數十舟載兵迎敵望金人戰艦在前榮皇遽欲退不可徐謂眾曰無慮也金人止有數艦在前餘皆小舟方水退隔淖不能至岸我捨舟而陸殺棺中人耳遂棄舟登岸大呼而殺之金人不能騁舟中自亂溺水陷淖者不可勝計昌收餘眾二千奔楚州榮獲昌子婿佛寧俘械甚眾榮自京東來未嘗承王命遂無路告捷聞光世在鎮江乃遣人願聽節制且上其

功光世大喜以榮知泰州

繫年要錄四十三

五月丙午劉光世遣統制王德襲揚州執郭仲威以獻

伏誅

宋史高宗紀三

初仲威聞敵退乃以其將李懷忠知揚州而自往真州屯駐仲威與李成有舊聞其在九江欲往從之時滁濠鎮撫使劉綱以所部屯建康之雨花臺仲威為所扼不得進復還揚州謀據淮南以通劉豫光世遣前軍統制王德往捕之宣言游徼淮上至維揚仲威迎謁於摘星樓德手擒之遂并其眾

繫年要錄四十四

仲

威出於寇盜號郭大刀

王明清揮塵後錄

二年秋七月罷淮東路提點刑獄司

宋史高宗紀四

三年正月癸酉淮東久闕帥臣以湯東野知揚州充淮

東安撫使右承務郎鍾離濬嘗任高郵縣丞熟知本路

利害特遷一官通判揚州仍授東野兵千人以行賜米

六十斛黃金二百兩白金三千兩為養兵之用

繫年要錄六十

二案先是紹興元年命劉光世兼淮南京東路宣撫使治揚州經畫屯田二年又命光世將銳卒萬人屯揚州經理淮東光世迄不行時金兵留淮東光世畏其鋒故遷延以避之宋史言光世律身不嚴馭軍無法不肯為國任事於此見之

湯東野字德廣丹陽人奉祠起知揚州會偽齊宿遷

令張澤拔眾四千自歸朝論以國家方屈好於豫不

宜生釁欲還之東野不可章三上得請四千人皆免

死

京口耆舊傳

二月壬戌命統制巨師古部兵萬人屯揚州

宋史高宗紀四

壬午以韓世忠為淮南東路宣撫使六月甲申巨師古

坐違世忠節制除名廣州編管

同上

十一月省淮南州縣文武官

同上

四年五月甲寅詔淮南帥臣兼營田使守令以下兼管

營田

同上

九月庚午金齊合兵自淮陽分道來犯壬申渡淮楚州

守臣樊敘棄城去韓世忠自承州退保鎮江府同上

冬十月丙子朔與趙鼎定策親征命張浚以軍援淮東

同上

張浚字德遠漢州綿竹人建炎三年除知樞密院川

陝宣撫處置使辛炳在潭州浚以檄發兵不遣劾之

至炳為御史中丞率同列劾浚居福州浚既去國慮

金人釋川陝之兵必并力窺東南上疏極言其狀未

幾劉麟果引金兵入攻高宗思浚言手詔辨前誣除

知樞密事浚既受命即日赴江上視師時兀朮擁兵

十萬於揚州約日渡江決戰浚長驅臨江召韓世忠

張俊劉光世議事將士見浚勇氣十倍浚既部分諸

將身留鎮江節度之世忠遣麾下王愈詣兀朮約戰

且言張樞密已在鎮江兀朮曰張樞密貶嶺南何得

在此愈出浚所下文書示之兀朮色變夕遁孝宗即

位除江淮東西路宣撫使治高郵巢縣兩城飭兩淮

守備拜尚書右僕射同中書門下平章事都督如故

致仕卒贈太師諡忠獻宋史浚本傳

已卯淮東宣撫使韓世忠以所部自鎮江復如揚州繫年

要錄八

自金人入境揚州官吏退保陰沙承州官吏皆散淮

東轉運判官郭楫亦挈家先遁徽猷閣待制新知揚州宋伯友至鎮江奏言孤獨一身前去未得乞郡兵萬人與韓世忠同赴敵迎戰乃命伯友從便伯友引疾乞祠許之同上

戊子韓世忠邀擊金人於大儀鎮敗之

宋史高宗紀四

韓世忠字良臣延安人以勇敢應募建炎二年升定國軍承宣使帝如揚州世忠以所部從張遇李民降授京西等路捉殺內外盜賊累遷淮南宣撫使四年金人與劉豫合兵分道入侵帝手札命世忠飭守備圖進取世忠受詔感泣遂自鎮江濟師俾統制解元守高郵候金部卒親提騎兵駐大儀當敵騎伐木爲柵自斷歸路會遣魏良臣使金世忠撤炊爨給良臣有詔移屯守江良臣疾馳去世忠度良臣已出境卽上馬令軍中日視吾鞭所嚮於是引軍次大儀勒五陳設伏二十餘所約聞鼓卽起擊良臣至金軍中金人問王師動息具以所見對聶兒孛堇聞世忠退喜甚引兵至江口距大儀五里別將撻孛也擁鐵騎過五陳東世忠傳小麾鳴鼓伏兵四起旗色與金人旗雜出金軍亂我軍迭進各持長斧上樅人胸下斫馬足敵被甲陷泥淖世忠麾勁騎四面蹂躪人馬俱斃

遂擒撻孛也等二百餘人解元至高郵遇敵設水軍
夾河陳一日合戰十三未決世忠遣成閔將騎士往
援復大戰俘生女真及千戶等世忠復親追至淮金
人驚潰相蹈藉溺死甚眾論者以此舉為中興武功
第一五年進少保六年授京東淮東宣撫使置司楚
州劉猷將寇淮東為世忠兵扼不得進七年築高郵
城民益安之

宋史世忠本傳

已丑金人攻承州韓世忠遣將成閔解元合兵擊於北

門敗之

宋史高宗紀四

初金人至近郊元料翼日必至城下乃伏百人於路又伏百人於城東北嶽廟下自引四百人伏路隅令

曰金人以高郵無兵必輕易而進俟金人過我當先
出掩之伏要路者見我麾旗則立幟以待金人進退
無路必取嶽廟走則伏者出眾皆諾又密使人伏樊
良決河岸以過其歸路食時金人果趣城下元密數
之有一百五十騎乃以伏兵出金人大驚向嶽廟走
元追之擒一百四十八人戰馬器械皆為元所得

繫要錄八十一

時城中兵不滿三千金萬戶黑頭虎直造

城下約降元匿其兵以微服出偽若降者金人稍懈

俄伏發擒黑頭虎未幾金兵四集元戰卻之追北數

十里金人赴水死者甚眾

宋史元本傳

十一月庚戌蠲承楚泰州水砦民兵賦役十年

宋史高宗紀四

時承州水砦首領徐康潘通等邀擊金兵俘女真數

十既命以官尋又賜米萬石

繫年要錄八十二

乙卯韓世忠遣兵夜劫金人營於承州破之

宋史高宗紀四

十二月辛巳命中軍統制王進屯兵泰州防扼通泰

同上

辛丑泰州陵亭水砦馮定捕敵三十九人

繫年要錄八十三

壬寅省淮南轉運司

宋史高宗紀四

五年春正月己酉免淮南官吏去職之罪仍令還任承

州水砦統領仲諒復入楚州

宋史高宗紀五

乙丑罷淮南茶鹽提刑司置提點兩路公事官一員兼

領刑獄茶鹽漕運市易事

同上

六月壬子復省淮南州縣冗官

同上

十一月辛巳復置淮南提舉鹽事官

同上

六年二月壬寅改江淮屯田為營田

同上

七年二月偽齊劉豫遣姦細縱火於淮甸及沿江諸州

於是山陽儀真廣陵京口當塗皆被其害

繫年要錄一百九

夏四月庚申罷淮南提點司東西兩路各置轉運兼提

點刑獄提舉茶鹽常平事

宋史高宗紀五

六月乙未罷江淮營田司令諸路安撫轉運司兼領其

事上同

九年五月乙未復置淮東提舉茶鹽司 宋史高宗紀六

八月己酉復淮南諸州學官 同上

十一年二月辛巳知泰州王瑒兼通泰制置使措置水

砦鄉兵控守二州 繫年要錄一百三十九

十二年十一月癸巳以左司郎中李椿年為兩淮轉運

副使專治經界 宋史高宗紀七

二十七年冬十月癸卯築通泰楚三州捍海堰 宋史高宗紀八

二十八年春正月癸未遣戶部郎中莫濛等檢視淮南

沙田蘆場 同 六月甲寅增淮東沙田蘆場租課置提領官田所掌之

同上

二十九年閏月己未罷淮東沙田蘆場所增租課 同上

辛未復置江淮路提點坑冶鑄錢官 同上

三十年春正月壬寅募人墾淮南荒田 同上

三月癸未以淮東茶鹽司錢十萬緡充募民墾田費 同上

七月辛巳建武軍承宣使許世安添差淮南東路馬步

軍副都總管揚州駐劄 繫年要錄一百八十五案是時金主亮將徙居汴京以逼宋

三十一年六月壬寅利州觀察使張榮添差淮南東路

馬步軍副總管泰州駐劄 繫年要錄一百九十

丙午劉錡乞即日移軍渡江詔錡進發騎兵屯揚州宋史

高宗紀九

時宿將無在者乃以錡為江淮浙西制置使節制逐

路軍馬宋史錡本傳錡傳詳後

丙寅聽淮南諸州移治清野宋史高宗紀九

八月乙卯劉錡引兵屯揚州遣統制王剛以兵五千屯

寶應同上

錡將渡江以軍禮久不講乃建大將旗鼓以行軍容

整肅江浙人所未見也繫年要錄一百九十二錡在揚州謀

報金以二十五日渡淮謂通判楚州徐宗偃曰錡來

日提師自天長趣盱眙君速歸語太守寶應以北日

下清野勿留寸草有不如約當以軍法從事同上

九月戊戌劉錡發揚州宋史高宗紀九錡在揚州病上遣中使將醫往視錡曰錡本無疾但

邊事如此至今猶未決用兵俟敵人侵擾然後使錡

當之既失制敵之機何以善後此錡所以病也中使

以奏錡遂行時錡已病不能食但啜粥而已繫年要錄一百

九十

十月乙巳劉錡引兵次淮陰金人將自清河口入淮錡

列兵運河岸以扼之戊申王權聞金兵大至自廬州引

兵遁乙卯錡聞權遁引兵歸揚州

宋史高宗紀九

錡之未退也檄淮東副總管張榮以所部人船盡赴

淮陰榮被檄即發泰州至楚州則大軍已退其所統

民兵皆驚潰榮收散亡僅千人至邵伯埭決運河水

入湖以自保焉

繫年要錄百九十三

丙辰侍衛步軍司右軍統制邵宏淵以左右二軍至真

州

戊午葉義問督視江淮軍馬中書舍人虞允文參謀軍

事金人犯真州步軍司統制邵宏淵逆戰於胥浦橋兵

敗真州陷金人遂犯揚州

宋史高宗紀九

於胥浦橋命將三人拒橋上金人弓矢盡發王師多

死城中老弱皆竄避敵實草以渡河三將皆死宏淵

率親隨軍入城掩關以拒故軍民皆奔江上得舟渡

江以免宏淵毀牖退屯楊子橋真州遂陷敵得城不

入徑自山路犯揚州劉錡軍還至邵伯埭聞金犯真

州疑揚州已不守探者報城上旗幟猶是官軍錡曰

雖失真州猶為國守當速進乃自北門入見安撫使

劉澤以城不可守勸錡退屯瓜洲

繫年要錄一百九十三

梁

淵元宗張昭俱為邵宏淵偏將宏淵控儀真以所領

二千人分三之一配三將金人以大軍壓之軍士愕
眙莫有鬪志三將奮臂一呼士氣百倍昭屢衝敵陳
為士卒先宗提軍深入手梟敵將力窮陷陣死昭亦
中流矢斃淵方據浦自守敵以驍將銳卒乘之淵單
馬直前挾驍將歸而銳卒捷出忽斷淵右臂臂已斷
氣不衰回顧叱咤敵膽落不能加兵淵顧援兵不至
遂挾敵將墮橋下與之俱死嘉泰初立廟合祀之

廟記略 雍正志云舊志作元怡梁宏張昭據漫堂
廟記改正三將戰死雖同而淵死尤烈亦依廟記以
淵冠首

壬戌劉錡退軍瓜洲鎮金人陷揚州淮東安撫使劉澤

棄城奔泰州 宋史高宗紀九

金人攻揚州屯於平山堂下揚州軍民傾城而奔錡
乃退軍自南門外拆民屋作浮橋諸軍過絕即毀橋
而去 繫年要錄百九十三

乙丑金人趣瓜洲劉錡遣統領員琦拒之於阜角林敗
之斬其統軍高景山 宋史高宗紀九

金人既得揚州即遣兵來爭瓜洲渡錡命部將賈和
仲吳超等拒之於阜角林員琦陷重圍下馬死戰部
將王佐以步卒百有四人往林中設伏敵入弩發敵
以運河岸仄非騎兵之利稍引去遂大敗之斬景山

俘數百人錡在瓜洲無日不戰恐人心不固乃遣人
自鎮江取妻子以安人心至是有詔令錡專防江上
會病已劇乃肩輿渡江留劉汜以千五百人塞瓜洲

渡 劉時舉續宋編年通鑑七

十一月庚午金人犯瓜洲渡中軍統制劉汜用克敵弓
射卻之金人焚驛亭而去繫年要錄一百九十四

壬申金人犯瓜洲鎮江中軍統制劉汜戰敗走權都統
制李橫亦遁金人鐵騎奄至江上統制魏俊王方死之

宋史高宗紀九

時金人以重兵直擣瓜洲李橫引諸軍迎戰葉義問

督鎮江駐劄後軍渡江東視不可義問疆之懼怯之

狀見於顏色市人皆媒罵之金人兵勢甚重汜提本

部兵先走諸軍皆不進橫以孤軍不能當亦遁失其

都統制印金人追官軍官軍壅路不能行遂涉運河

而西亦有得脫者左軍統制魏俊後軍統制王方戰

死柳林中皆金創被體汜性驕惰不習軍事至是卒

敗繫年要錄一百九十四 魏俊贈中衛大夫邕州觀察使王

方贈拱衛大夫蘄州防禦使官子孫如新格同上

甲申金主亮至揚州宋史高宗紀九

丁亥劉錡以疾罷同上

劉錡字信叔德順軍人瀘州節度使仲武子紹興三十一年金主亮調軍六十萬自將南來中外大震以錡爲江淮浙西制置使節制逐路軍馬引兵屯揚州軍容甚肅觀者歎息金人以羶裹船載糧而來錡使善沒者鑿沈其舟金人議留精兵在淮東以禦錡而以重兵入淮西大將王權不從錡節制不戰而潰自清河口退師揚州以舟渡眞揚之民於江之南留兵屯瓜洲錡病求解兵柄畱其姪汜以千五百人塞瓜洲渡又令李橫以八千人固守詔錡專防江錡遂還鎮江十一月金人攻瓜洲汜固請出戰錡不從汜拜

家廟而行金人以重兵逼瓜洲分兵東出江皋逆趨瓜洲汜先退橫亦卻魏俊王方死之橫汜僅以身免錡憤懣病益甚召詣闕錡疑汜累已常懼有後命二十二年閏二月錡發怒嘔血數升而卒贈開府儀同三司謚武穆金主亮之南下也下令有敢言錡姓名者罪不赦枚舉南朝諸將問其下孰敢當者皆隨姓名答如響至錡莫有應者然錡卒以病不能成功世傳錡通陰陽家行師所避就在揚州命盡焚城外居屋用石灰盡白城壁書曰完顏亮死於此金主見而惡之遂居龜山人眾不能容以致變云

宋史錡本傳案魏俊傳

庚寅亮至瓜洲

宋史虞允文傳

亮在瓜洲鎮御營宿衛使楊存中中書舍人虞允文

以車船臨期不堪駕用乃臨江拽試命戰士踏車船

中流上下三周金山回轉如飛敵眾驚愕亮笑曰紙

船耳一將跪曰南軍有備願駐揚州徐圖進取亮怒

命斬之哀謝良久乃杖半百

繫年要錄一百九十四

甲午會舟師於瓜洲渡期以明日渡江

金史海陵紀

乙未金人陷泰州是日金人弑其主亮於揚州龜山寺

宋史高宗紀

初亮在瓜洲聞李寶由海道入膠西焚其戰艦成閔

諸軍方順流下亮忿乃還揚州召諸將約三日畢濟

過期盡殺之諸將謀曰南軍有備進有滄殺之禍退

有敲殺之憂等死死中求生可乎總管萬戴曰殺郎

主與宋通和則生矣眾曰諾亮夕與后妃飲言三日

渡江不得大臣盡斬諸將聞之益懼亮謂威勝統軍

耶律阿里曰爾所將兵數少必誅無怨阿里與其子

穆爾古謀亦欲弑亮亮有紫茸等細軍不遣臨敵專

以自衛眾患之奏遣細軍取海陵謂細軍曰淮東子

女金帛逃在泰州何不往取之細軍欣然共請亮許

之於是去者過半

繫年要錄一百九十四

黎明元宜王祥與

武勝軍都總管徒單守素等率眾犯御營海陵聞亂以爲宋兵奄至攬衣遽起箭入帳中取視之愕然曰我兵也大慶山曰事急矣當出避之海陵曰走將安往方取弓已中箭仆地延安少尹納合幹魯補先刃之手足猶動遂縊殺之驍騎指揮使大磐整兵來救祥出語曰無及磐乃止軍士攘取行營服用皆盡乃取大磐衣巾裹海陵尸焚之遂收尙書右丞李通浙西路副統制郭安國監軍徒單永年近侍局使梁琬副使大慶山皆殺之

金史逆臣完顏元宜傳

諸酋斃亮兼殺

侍寢妃花不如等五人明日諸酋遂麾軍退屯三十

里

斃駒采石斃亮記

先是泰州守臣請祠去通判王濤權

州事九月濤以移治爲名而去留州印付兵馬都監趙福金人侵淮甸水砦都統領胡深與其副臧珪棄水砦率鄉兵二千入泰州以兵勢凌福福具申於葉義問義問以深權知州深以珪權通判福權本路兵馬都監淮南轉運副使提領諸路軍馬楊抗又以其右軍統領沙世堅權海陵縣丞兼知縣深聞金人欲犯泰州與世堅棄城先遁珪掘斷堰盡泄運河水至是敵細軍至城下遂徑登城縱火擄掠福死於亂兵

城中子女強壯盡被驅去時楊存中命右軍統制王剛以所部權知泰州而城已陷矣繫年要錄一百九十四

十二月庚子楊存中及虞允文渡江至瓜洲察金兵宋史

高宗紀九

辛丑細軍之在泰州者棄城而去繫年要錄一百九十五

壬寅成閔渡江之揚州宋史高宗紀九

時葉義問遣使臣李彪伺金人回軍動靜閔令報曰成太尉大軍在揚子橋相持來日當大戰彪不聽道

路喧言金人已去揚州空虛閔計不行乃以軍馬司之兵自天長追襲主管侍衛步軍司公事李捧亦以

神勇軍襲之敵軍數萬竄其行如林官軍皆不敢近但遙護之出境而已繫年要錄一百九十五

癸卯和州防禦使權知揚州賈和仲聞敵去乃以單騎入城猶未有官吏同上

右軍統領沙世堅入泰州宋史高宗紀九

甲辰右軍統制權知泰州王剛以所部至本州中軍統

制顧暉引兵泊瓜洲鎮繫年要錄一百九十五

乙巳金人遊騎焚眞州報恩寺塔逕往天長同上

三十二年春正月楊存中措置兩淮宋史高宗紀九

夏四月甲戌募民耕淮東荒田蠲徭役租稅七年同上

五月甲寅命張浚專一措置兩淮事務兼節制淮東西
沿江州郡軍馬同上

乙卯張浚置御前萬弩營募淮民為之同上

重修揚州府志卷之六十七

重修揚州府志卷之六十八

事略志四

宋下

孝宗隆興元年春正月庚子張浚進樞密使都督江淮

東西路軍馬宋史孝宗紀一

六月庚午張浚自盱眙還揚州同上案浚還在符離喪師之後

十月辛巳詔江淮軍馬調發應援從都督府取旨餘事

悉以聞同上

二年三月丙戌張浚視師江淮金軍退王宗沐續鑑宋紀三十七

庚戌以戶部侍郎錢端禮為淮東宣諭使詔撫諭軍民

宋史孝宗紀一

四月戊辰罷江淮都督府同上

九月癸卯命湯思退都督江淮東西路軍馬辭不行乙

巳復命楊存中為同都督錢端禮吳芾並為都督府參

贊軍事同上時張浚已薨

罷宣諭司同上

冬十月辛巳金人分道渡淮同上

十一月丁亥復命王之望督視江淮軍馬戊子命王之望

同都督巳丑罷同上

之望與湯思退表裏專以割地啖金為得計帝詔督

府擇利害擊金之望下令諸將不得妄進言者論之

遂免王宗沐續鑑宋紀三十七

庚寅命楊存中都督江淮軍馬宋史孝宗紀一

時諸軍各守分地不相統一存中集諸將調護之於

是始更相為援會金兵已深入朝議欲舍淮保江存

中持不可乃已宋史存中本傳

閏月金人寇揚州王宗沐續鑑宋紀三十七

金兵在揚州或勸存中擊之存中不敢渡獨臨江固

壘以老之金人尋請盟宋史存中本傳

乾道元年春正月辛未立兩淮守令勸民種桑宋史孝宗紀一

乙亥罷兩淮提撫司同上

二月乙酉罷江淮都督府遣官檢察兩淮州縣振濟飢

民同上時與金人通和

九月乙亥置沿淮諸州都巡檢同上

二年八月辛未朔詔兩淮行鐵錢同上

丁丑蠲淮南放歸萬弩手差役同上

十一月巳酉兩淮總領所許自造會子鬻諸路營田同上

三年五月庚申修揚州城宋史孝宗紀二

冬十月戊戌修真州城同上

令兩淮通行銅錢會子續宋編年

四年秋八月主管殿前司公事王琪奉詔案視兩淮城

壁琪擅令揚州增築新城揚民言不便劉琪乞罷琪忤

帝意既而琪以擅興工役降三官放罷薛應旂宋元通鑑八十三

五年春正月甲戌措置兩淮屯田宋史孝宗紀二

九月巳未罷淮東屯田官兵募民耕佃辛酉詔淮東諸

州農隙教闔民丁同上

陳俊卿以兩淮備禦未設民無固志請於揚州和州

各屯三萬人預為家計仍籍民家三丁者取其一以

為義兵授之弓弩教以戰陳農隙給兩月之食聚而

教之帝以為然詔即行之然為眾論所持俊卿尋亦

去位不能及其成

王宗沐續鑑
宋紀三十七

十一月癸丑朔復置淮東萬弩手名神勁軍

宋史孝
宗紀二

十二月降會子收兩淮銅錢

續宋編年
通鑑九

六年三月己卯復置都大發運使

宋史孝
宗紀二

夏四月辛巳朔罷鑄錢司歸發運司并淮東總領所歸

淮西

同上

十二月癸酉罷發運司

同上

七年春正月復鑄錢司

同上

三月庚寅遣使覈兩淮種麥

同上

五月戊寅復置淮東總領所

同上

六月壬申詔兩淮限田毋糶增稅賦

同上

八月丙辰詔兩淮民丁充兵者丁錢勿輸

同上

九年三月丙辰復分淮南安撫司為東西路

同上

淳熙元年春正月庚子罷兩淮將帥權攝官

同上

二年九月乙卯朔湯邦彥請分揚廬州荆南襄陽府金

州興元府興州為七路每路文臣一人充安撫使以治

民武臣一人充都總管以治兵三載視其成以議誅賞

從之

同上

三年二月壬午蠲兩淮教閱民兵夏稅

同上

四年十一月丁酉詔兩淮歸正人為強勇軍

同上

五年十二月丙午禁兩淮銅錢復行鐵錢宋史孝宗紀三

八年閏月庚寅修揚州城同上

九年春正月丁丑命兩淮戍兵歲一更同上

十年十一月乙丑降會子收兩淮銅錢同上

十一年二月甲申詔兩淮萬弩手令在家閱習許歲上

材武者一二人試授以官同上

光宗紹熙元年夏四月乙酉詔兩淮措置流民宋史光宗紀一

二年春正月庚戌朔命兩淮行義倉法同上

秋七月己未出會子百萬緡收兩淮私鑄鐵錢同上

十二月庚子復出會子百萬緡收兩淮鐵錢同上

三年春正月收淮東鐵錢同上

秋七月壬辰修揚州城同上

八月甲寅詔兩淮行鐵錢交子同上

九月丙申勸兩淮民種麥同上

寧宗慶元元年二月丁巳朔詔兩淮諸州勸民墾闢荒

田宋史寧宗紀一

五年冬十月庚申朔封郭師禹為廣陵郡王同上凡追贈如揚

王昉廣陵郡王宗誼之類今皆不載又宗室世系表有廣陵侯士礪未知何時封附錄於此

嘉泰三年夏四月丙午出封榕庫兩淮交子一百萬命

轉運司收民間鐵錢宋史寧宗紀二

冬十月丙午命兩淮諸州以仲冬教閱民兵萬弩手同上

開禧元年八月乙巳以殿前副都指揮使郭倪為鎮江

都統兼知揚州同上時韓侂胄密為北伐之計

十一月乙酉置殿前司神武軍五千人屯揚州同上

十二月庚午增刺馬軍司弩手同上

二年夏四月己巳調三衙兵增戍淮東同上

五月壬寅簡兩淮田卒以備戰兵同上

六月命邱密至揚州部署諸將悉三衙江上軍分守江

淮要害同上

八月壬申以淮東安撫司所招軍為御前強勇軍同上

十月丙子金人自清河口渡淮遂圍楚州十一月庚辰

命主管殿前司公事郭杲領兵駐真州以援兩淮同上

甲申以邱密簽書樞密院事督視江淮軍馬同上

甲辰金人犯真州同上

金紇石烈子仁陷真州士民奔逃渡江者十餘萬知

鎮江府宇文紹節亟具舟以濟又廩食之自是淮西

縣鎮皆沒於金王宗沐續鑑宋紀四十一

十二月甲寅金人攻六合縣郭倪遣前軍統制郭僕救

之遇於胥浦橋官軍大敗倪棄揚州走瓜洲渡續宋編年通鑑

三十

丁卯金人自淮南退師宋史寧宗紀二

庚午募兩淮流民耕種同上

三年春正月己卯命張巖督視江淮軍馬同上

巖開督府九月費耗縣官錢三百七十萬緡而無成

功宋元通鑑九十六

十二月癸卯以邱密為江淮制置大使宋史寧宗紀二

時趙淳己為制置使故加大以別之兩朝綱目備要十

嘉定二年八月甲子聽兩淮諸州民行鐵錢於沿江八

州宋史寧宗紀三

是歲揚楚盜起同上

三年夏四月丙寅詔監司守臣安集泰州民經賊蹂踐

者同上

五月乙未淮東賊悉平同上

徐景為興化令楚賊胡德等率眾掠縣景諭以逆順

禍福賊怒欲害之景曰人誰無死得死王事何憾但

勿殘吾民賊義之不加害景練兵設備數月賊平興化

縣志

戊申經理兩淮屯田宋史寧宗紀三

十年夏四月丙辰詔江淮制置使李珪措置調遣仍聽

便宜行事宋史寧宗紀四時金人渡淮犯光州

賈涉請城寶應役興以憂去金人犯光州起涉竟前役

通判真州事見宋史涉本傳

十一年春正月壬午李全率眾來歸敕李珪令慰接之

邵經邦宏簡錄九十六

李全者北海農家子銳頭蠡目權譎善下人以弓馬

趨捷能運鐵槍時號李鐵槍楊安兒起掠莒密母舅

劉全為帥汲君立等附之全與兄福聚眾數千劉慶

福等附之金遣完顏霆討安兒安兒輕舸走即墨舟

人斬以獻安兒妹四娘子狡悍善騎射劉全收潰卒

奉之稱曰姑姑眾尚萬餘全以其眾附楊氏通焉遂

嫌之合全軍與霆戰又敗收餘眾保東海劉全分軍

駐峒上宋史叛臣傳中淮人季先沈鐸說楚州守應純之

以招山東人劉全李全等以其眾至宋史賈涉傳

十二年三月金人分兵犯天長六合淮南流民渡江避

亂諸城悉閉宋史寧宗紀四

洪咨夔字舜俞於潛人崔與之帥淮東辟置幕府邊

事纖悉為盡力邱壽雋代與之為帥金人犯六合揚

州閉門設守咨夔亟詣壽雋言金人忌楚必未至揚

乃先自示弱淮左之人心動金人且驕必來矣第當

遠斥堠精閒探簡士馬張外郡聲援而大開城門晏

然如平時若金人來某當身任之金人果遁宋史容夔本傳

丁宗魏金壇人再令楊子縣兼義武兵民軍政時

金人犯境眾洶洶欲渡江避之宗魏曰守禦之臣宜

死封疆敵至而避誰與守乎卒不許人服其忠儀徵縣志

九月丙午罷江淮制置各置主管公事命賈涉任淮東

兼節制京東河北路軍馬邵經邦宏簡錄九十六

十三年夏四月賈涉招諭山東兩河豪傑來歸同上

李全白制府請於朝以劉全為總管駐揚州分數千兵

從之而將其眾宋史叛臣傳中

時命沈鐸為楚州都監與高忠皎各集中忠義民兵分

三道攻金遂以李全五千人附忠皎全分兵襲破莒

州授京東副總管進總管屯楚州石珪歸元漣水軍

未有所屬全并將之又以劉全駐揚州而將其眾同上

十六年十一月許國自武階換朝議大夫淮東安撫制

置使同上

十七年正月國之鎮楊氏郊迂國辭不見楊氏慙以歸

國既視事痛抑北軍有與南軍競者無曲直偏坐之同上

十一月國集兩淮馬步軍十三萬大閱楚城之外同上

理宗寶慶元年三月甲午李全反焚楚州制使許國走

死宏簡錄九十七

初國倚揚州強勇軍統制彭興及淮西親兵將趙社
朱虎等爲腹心至是首降賊且助爲亂

宋史叛臣傳中

忠

義統領王文信有眾八百刺揚州強勇軍國之大閱
文信在焉慶福與謀令歸襲揚州別遣將劫寶應盱
眙四將不從謀中輟至是文信復獻計曰我僞作重
傷提兵歸揚州揚守必不疑我生縛守以城獻飲而
遣之丁巳文信至揚州其徒有亡入城告變者時揚
兵皆在楚知州兼提點刑獄汪統會同官議鈐轄趙
拱曰若不納則文信必曰我歸營何故見拒將借是
以魚肉城外之民拱素善文信請說止其兵而以單

騎入俟入城而殺之然後撫其兵統喜遣之遇文信
於十里頭置酒相勞苦文信僞爲裹創狀拱曰揚州
人見忠義暮歸豈不相疑不若暫駐兵城外同見提
刑提刑急欲知楚州事也文信不疑聯騎入城坐客
次拱先入勸統收戮之統不敢發劉全知其謀帥甲
士突入郡堂厲聲曰王統領好人提刑不必疑請出
受參統不得已出而犒之劉全以兵翼之出館其家
詰旦統未有處拱又請引文信出城與議回屯楚州
文信知事泄就拱出劉全亦請從至平山堂文信責
拱賣已欲殺之拱曰我已存三城人身死無憾然我

死汝八百家老幼在城豈得生耶眾色動文信劉全
 遂還楚州時盱眙總管夏全亦懷異圖劉瑄厚賂之
 乃止及文信亂瑄懼夏全復動使卞整將兵三千視
 之使不敢動整以邀文信為辭引兵還揚州因譌言
 盱眙失守卞整為亂於是揚州復震城門晝閉同
 趙范知揚州乞調葵以強勇雄邊軍五千屯寶應以備

賊宋史趙葵傳
葵傳詳後

趙范字武仲少從父軍中嘉定十五年通判揚州十
 七年進直徽猷閣知揚州淮東安撫副使劉全王文
 信二軍老幼畱揚范欲修軍政懼漏泄兵機遣徐晞

稷書令挈家歸楚有孫海者眾亦八百弁請抽還楚
 州又請勅馬軍三千招游手之強壯者及籍牢城重
 役人充之別籍民為半年兵春夏在田秋冬教閱官
 免建砦而私不廢農彭義斌請合謀討李全范告制
 置使趙善湘不報又上書史彌遠曰揚州者國之北
 門一以統淮一以蔽江一以守運河豈可無備紹定
 三年起淮東安撫副使又為書告廟堂請罷調停之
 議一請檄沿江制置司調王明本軍駐泰興港以扼
 泰州下江之捷徑一請檄射陽湖人為兵屯其半高
 郵以制賊後屯其半瓜洲以扼賊前一請速調淮西

兵合滁陽六合諸軍圖救江西朝旨乃許范刺射陽湖兵毋過二萬就聽節制於是討賊之謀決遂戮全

進兵部侍郎淮東安撫使兼知揚州兼江淮制置使

參謀官歷進兩淮制置使宋史范本傳 秦范衡山人具趙方傳

彭義斌出兵與全門全敗義斌以千五百騎追之獲馬

二千匹皆揚州強勇軍馬宋史叛臣傳中

紹定元年春全厚募人為兵宋軍多亡應之天長民保

聚為十六砦比歲失業壯者皆就募射陽湖浮居數萬

家家有兵仗侵掠不可制宋史叛臣傳下

全知東南利舟師謀習水戰募南匠大治舳舻船自淮

及海相望六月試舟射陽湖同上 時趙善湘禁桐油

市櫛木往揚善湘易以松木全不得已代以榆板舟成多重滯

二年九月全密遣軍掠高郵寶應天長之間知高郵軍

葉秀發遣宗雄武領民兵捍禦為賊所敗同上

三年五月甲寅檢校少保李全授彰化保康軍節度使

開府儀同三司京東鎮撫使宋史理宗紀一

全欲先據揚州以渡江分兵徇通泰以趨海其下皆

曰通泰鹽場在焉莫若先取為家計全欲朝廷不敢

遠絕其給乃挾蒙古李宋宣差以恫疑恐喝而蒙古

實未嘗資全兵其李宣差則青州賣藥人也朝廷雖

知其姦姑事苟安不之詰及全糴麥舟過鹽城知揚州翟朝宗嗾尉兵奪之全怒水陸數萬逕擣鹽城入據之白於朝曰遣兵捕盜過鹽城令自棄城去慮軍民驚擾入城安眾朝廷乃授全節鉞令釋兵全不受制命朝廷為罷朝宗命通判趙璈夫攝州事趙范趙葵以全必反累疏言之王宗沐續鑑宋紀四十四敬本作敬從宋史改

八月乙巳進善湘煥章閣學士江淮制置大使范直徽猷閣知揚州淮東安撫副使葵直寶章閣淮東提點刑

獄俱節制軍馬宋史叛臣傳下案

十二月壬子李全寇揚州璈夫逐趙范於鎮江葵帥雄

勝寧淮武定強勇四軍萬四千赴之王宗沐續鑑宋紀四十四

四年春正月壬寅趙范趙葵等誅李全於新塘宋史理宗紀一

全兵突至灣頭璈夫恐欲走副都統丁勝劫閹者止之全攻城南門都統趙勝自堡砦提勁弩赴大城注射全稍退遣劉全奄至堡砦西城下欲奪之以璈大城先是趙勝屯西城見濠淺盛暑中督軍浚濠人苦之朝宗亦以為笑既浚勝決新塘水注焉及是劉全不能進勝又浚市河人尤謂不急全至勝開水門納賈舟千餘艘活者數千人糧貨不與焉時朝廷有內圖戰守外用調停之說是日璈夫得彌遠書許增萬

五千人糧勸全歸楚州璪夫亟遣授全全笑曰丞相
勸我歸丁都統與我戰非相給耶擲書不受惟畱省
割璪夫始亟發牌印迓范癸丑全塞泰州城濠于邦
傑宗雄武通全戒守者無發矢俟薄城而蹙之全得
距堙宋濟恐濟秦州守令縣尉某如全壘全以增糧省檄
示之尉復出獻錢二百萬以降乙卯邦傑雄武開門
導全濟帥僚吏出迎全入坐郡治濟發帑出所獻錢
全曰獻者汝私藏耶若泰州則我固有何假汝獻爲
乃舍濟僉判廳入郡堂盡收子女貨幣庚申全聞范
葵旣入甲子配兵守泰州悉出眾至灣頭立砦據運
河之衝使胡義將先鋒駐平山堂伺三城機便丁卯
全攻城東門不利賊將張友呼請見葵全隔濠立馬
相勞苦葵切責之全彎弓抽矢向葵而去戊辰張璣
戴友龍王銓張青以天長制勇三軍至阻全不得前
遣人請援范葵親出堡砦西門列陳待之全不敢動
璣等乃入城庚午全率步騎五千餘攻堡砦西門趙
勝出兵戰不利范葵以兵益之全兵亦增葵擊卻之
辛未賊引兵二萬向西門李虎趙必勝張璣崔福力
戰自己至申全乃歸必勝王鑑于俊擊走之襄兵萬
人至眞州上壩統制張達監軍張大連不設備魚貫

而行全哨馬帥田四擊之爲數截殲者五千達大連
死之淮西援兵至亦遇全統領桑青力戰城中俱不
知也全兇焰益振每日我不要淮上州縣渡江浮海
逕至蘇杭孰能當我甲戌復引輕騎犯州城南門且
欲破堰泄濠水統制陳達率勁弩射之范葵出軍迎
擊乃去是日余玠史譌作金玠等距淮安十里焚全砦柵
全將劉全出戰玠軍不利退屯寶應全志吞三城而
兵每不得傳城下宗雄武獻計悉眾及驅鄉農合數
十萬列砦圍二城糧援俱絕范葵命諸門各出兵劫
砦舉火爲期夜半縱兵衝擊殲賊甚眾自是賊一意

長圍以久持困官軍不復薄城戊寅全張蓋奏樂平
山堂布置築圍指揮閒暇范葵令輕兵牽制親帥將
士出堡砦西全分兵鏖戰自辰至未殺傷相當庚辰
范出師大戰玠等破全將張友於都倉獲糧船數十
艘甲申葵出戰賊大敗四年正月辛卯全兵浚圍城
塹范葵遣諸將出城東門掩擊全走土城官軍躡之
蹂溺甚眾是日玠破全將鄭祥獲糧百艘乙未李虎
出南門楊義出東門王鑑出西門崔福出北門各徑
掘賊圍開土城數處范葵提兵策應全步騎數千出
戰諸軍奮擊俘馘甚眾夜賊復合所開城丁酉趙勝

遣統制陸昌孫舉立橋堡砦於北門賊分道來戰勝
擊退之范陳於西門賊閉壘不出蔡曰賊俟我收兵
而出爾乃伏騎破垣門收步卒誘之賊兵數千果趨
濠側虎力戰城上矢石雨注賊退有項賊別隊自東
北馳至范葵揮步騎夾浮橋弔橋並出爲三迭陳以
待之賊與大戰別遣馬步五百出賊背而葵帥輕兵
橫衝之三道夾擊用范所制長槍果大利賊敗走翼
日全遣步卒三百餘向城西門乍進乍退以誘揚州
兵復驅壯丁填濠培鹿角范葵遣騎將出夾城東西
牽制之親出州城西門分二道以進賊望風潰乃募
勇力齎薪礮焚其樓櫓十餘賊自平山堂塵騎下救
道遇于俊軍而歸始全反謀雖成然多顧忌邊陲喜
事者陰贊之謂朝廷愈畏則錢糧愈增及三趙用削
全官又罷支錢糧攻城不得欲戰不利全始自悔忽
忽不樂或令左右抱其臂曰是我手否人皆怪之時
正月望城中放燈張樂姑示整暇全見之亦往海陵
載妓女張燈平山堂是晚燕元宣差宣差激全曰相
公服飾器用多南方物乃心終在南耳全乃取誥敕
朝服南向再拜焚之淚下如雨有胸山于道士者老
矣全迎致之初見全卽嘆曰我業債合在州償召占

事多驗尊爲軍師及見全焚誥命謂人曰相公死明日我無今日矣人問之曰朝廷以安撫提刑討逆然爲逆者節度使也豈有安撫提刑能擒節度使哉誥救旣焚則一賊爾固安撫提刑所得捕不死何爲入見全曰相公明日出帳門必死全怒斬之范葵夜議詰朝所向葵曰東向利不如出東門范曰西出嘗不利賊必見易因其所易而圖之必勝不如出西堡砦門壬寅全置酒高會平山堂有候卒識其槍垂雙拂爲號以報范喜謂葵曰此賊勇而輕若果出必成擒矣乃悉精銳而西取官軍素爲賊所易者張其旗幟

全望見喜謂宣差曰看我掃南軍官軍見賊突圍而前亦不知其爲全也范麾軍並進葵親搏戰諸軍爭奮賊始疑非前日軍欲走入土城李虎軍已塞其甕門全窘從數十騎北走葵率諸將以制勇寧淮軍蹙之賊趨新塘新塘自決水後淖深數尺會久晴浮戰塵如燥壤全騎陷淖不能拔制勇軍奮長槍三十餘亂刺之全曰無殺我我乃頭目先是令諸陳士眾獲頭目無得爭以爲獻故羣卒碎其尸而分其鞍馬器甲并殺三十餘人甲辰賊軍周海請降報全已殺餘黨議潰去未幾聞安用謂國安用歎恨飲泣初議推一人

爲首莫肯相下欲往淮安奉楊氏主之范夜上捷書
制置司議翼日追賊乙巳安用引五百騎逕南門趨
灣頭范伏弩射之賊呼曰爾襄陽援兵已敗走汝知
之乎城中應曰李全已戮汝何不降賊不應諸將欲
追范懼有伏兵先分兵燒圍城樓櫓夜半火光燭天
命東南諸門皆出兵范葵提精兵進賊大潰丙午黎
明葵追及於灣頭又被之俘斬及奪回糧畜蔽野別
將追至大儀不及葵使人墜新塘骸骨得左掌無一
指蓋全支解也先是全乞靈茅司徒廟無應全怒斷
神左臂或夢神告曰全死亦當如我至是果然揚州

平

宋史
臣傳下

趙葵字南仲京湖制置使方之子與兄

范俱有志事功嘉定十七年李全往青州淮東制置
使許國檄葵議兵葵至曰君侯欲圖賊而坐賊竄中
悔已無及惟有重帳前兵猶足制之國不聽卒敗寶
慶元年范知揚州調葵屯寶應備賊紹定二年全獻
俘葵策其必叛上書丞相史彌遠又言於朝願身許
朝廷彌遠猶未欲興討參知政事鄭清之贊決之乃
加直寶章閣淮東提點刑獄全攻揚州東門葵親出
搏戰賊將張友請葵出全在閣濠立馬相勞苦左右
欲射全葵止之問全來何爲全曰朝廷動見猜疑今

復絕我糧餉我非背叛索錢糧耳葵曰朝廷資汝錢糧寵汝官職蓋不貲矣待汝以忠臣孝子而乃反戈攻陷城邑安得不絕汝錢糧汝云非叛欺人乎欺天乎切責之言甚多全無以對於是數戰皆捷遂殺全尋進兵部侍郎六年授淮東制置使兼知揚州嘉熙元年以寶章閣學士知揚州葵前後畱揚八年墾田治兵邊備益飭景定元年授兩淮宣撫使判揚州累封冀國公薨贈太傅諡忠靖

宋史葵本傳

王鑑字仲明

李全犯揚州檄鑑從趙葵往救鑑乘賊始至迎擊之賊識鑑旗幟曰淮東硬軍也安撫使趙范戒朝食出戰葵曰非王都統不可約鑑帥兵往鑑擐甲待旦

馬至北門或以非地分勸徐行鑑揮之曰同舟遇風何地分爲全適宴北使於平山堂意驕我軍鑑率單騎直前相距纔數百步厲聲呼逆賊全汝在山東作賊歸宋得節度乃背義孤恩昊天不庇今日當盡子手全怒奔馬戰范葵遣兵斷全歸路全爲鑑所敗偕十餘騎走而西至新塘墮水鑑追至左右射全與其黨皆死捷聞特授左武大夫復州團練使乘勝復泰州破賊餘黨五年知真州終京湖宣撫司諮議

嘉靖志

余玠字義夫蘄州人家貧落魄喜功名走襄淮謁

趙葵葵壯之畱幕中以率舟師沂淮入河抵汴所向

有功歷遷淮東制置副使宏簡錄一百七十王霆為鎮江

都統趙勝計議官李全寇鹽城攻海陵勝出戍揚州

屬官多憚從行霆慨然曰此豈臣子辭難之日至楊

子橋人言賊兵在南門去將安之霆竟至南門身先

士卒大小十八戰無不利奪賊濠築土城焚城門賊

氣為懾宋史霆本傳案霆後知高郵軍詳宦蹟志吳從龍字子雲官

至武功郎建康府統制紹定兵難為先鋒援不至被

擒使至泰州城下誘降終不屈死之廟祀揚泰二州

賜額褒忠宋史忠義傳七嘉靖志云紹定十年李全攻海陵從龍遇害賜廟額曰顯勇案全

諱於四年正月舊志謂也其廟額亦未知何本

三月遣余子才率王旻等將萬五千人與子玠犄角取

鹽城癸巳步騎十萬發揚州宋史叛臣傳下

癸卯遣總管韓亮戚永昇率多槩船及民船四百入射

陽湖擊賊同上

五年春正月庚寅詔李全之叛淮東提刑司檢法吳澄

等出泰州城謁賊各追官勒停其不出見賊者高夢月

劉寶雲循升二資罵賊死者海陵簿吳嘉特贈朝奉郎

官其一子將仕郎宋史理宗紀一秦州官屬十九人皆迎降獨教授高

夢月不汚詔贈三官與此小異

端平三年十一月蒙古將察罕攻真州知州邱岳部分
 嚴明守具周悉蒙古薄城輒敗岳乘勝出戰胥浦橋以
 強弩射致師者一人死敵少卻岳曰敵眾十倍於我不
 可力勝乃為三伏設礮石待之於西城敵至伏起礮發
 殺其驍將敵眾大擾岳選勇士襲敵營焚其廬帳越二
 日乃引去

王宗沐續鑑
宋紀四十七

邱岳字山甫常熟人端平三年知真州凡四禦大敵
 未嘗少挫理宗御書忠實二字賜之後守揚州

嘉靖志

嘉熙元年十一月戊辰詔陳韡史嵩之趙葵於沿江淮
 漢州軍備舟師戰具防遏衝要堡隘

宋史理宗紀二

二年冬十月丁卯吳潛言宗子趙時頤集真滌豐濠四
 郡流民十餘萬團結十七砦其強壯二萬可籍為兵又
 沙上蘆場田可得二十餘萬畝賣之以贍流民以佐砦
 兵從之

同上

淳祐二年元太后馬真氏稱制元年秋七月張柔渡淮攻揚州

元史太宗

八月丁卯北兵侵真州杜杲擊敗之淮東先鋒馬軍鄧

淳李海戰於揚州撻扒店宣勞居多各轉兩官

宏簡錄九十七

三年元馬真太后二年二月乙丑以呂文德總統兩淮出戰軍

馬捍禦邊陲

宋史理宗紀二

九月壬申詔蠲高郵民耕荒田租同上

五年元馬真太秋七月蒙古察罕會張柔掠淮西至揚

州而去王宗沐續鑑

九年春正月辛酉詔兩淮沿江曠土軍民從便耕種宋史

理宗

十一年三月辛巳城寶應詔移一軍戍守同上

寶祐三年二月己卯復廣陵堡城賈似道以圖來同上

六年冬十月戊子元兵攻泰州同上

開慶元年冬十月癸卯北兵陷漣水軍揚州大震宏簡錄九

七十

十一月丙辰選揚州拱衛軍千人赴京聽調遣宋史紀四

景定元年秋七月戊子忽必烈遣翰林學士郝經持書

申好來告即位且徵歲幣似道使人拘之真州宏簡錄九十七

先是賈似道在鄂州私與蒙古議和妄奏鄂州圍解

還朝使其客廖瑩中撰福華編稱頌鄂功通國皆不

知所謂和也經至宿州遣副使何源劉人傑請入國

期不報經數遺書三省樞密院及制置使李庭芝似

道恐經至謀泄拘經於真州之忠勇軍營驛吏棘垣

鑰戶晝夜守邏欲以動經經不屈蒙古遣官詣淮東

訪問經等所在李庭芝奏蒙古使者久留真州亦為

似道所格

宋元通鑑一百十八

度宗咸淳二年冬十二月兩淮制置使李庭芝立城屯

駐武銳一軍

宋史度宗紀

始平山堂瞰揚城敵至則構望樓其上張弓弩射城

中庭芝築大城包之募汴南流民二萬餘人以實之

號武銳軍

王宗沐續鑑宋紀五十一庭芝累知揚州詳宦蹟志

案

蒙古郝經居真州館七年從者怒鬥死者數人經獨與

六人處別館

宋元通鑑一百二十一

三年二月乙丑淮東總領財賦陳蒙疏論賈似道姦邪

誤國安置建昌軍

宏簡錄九十八

四年春正月己丑檄兩淮都統張世傑申嚴備禦

宋史度宗

紀

張世傑范陽人歷知高郵軍調守鄂州提所部入衛

累加保康軍承宣使總督府兵勢頗振諸將大出師

焦山元阿朮以火矢攻之世傑敗奔圖山請濟師不

報軍迫臨安從二王入海兵敗厓山溺死

宋史忠義傳六

九年十一月戊子知泰州龔準遣將王大顯等捍禦有

功又獲俘民以還賞激有差

宋史度宗紀

甲午詔從李庭芝請分淮東西制置為兩司就命庭芝

交割淮東仍兼淮西策應使

同上

十年春正月知泰州龔準以天長縣東橫山秦潼湖青蒲口等處戰功推賞同

十月戊午郢州副統趙文義兄弟追戰全子湖皆死贈文義清遠軍文亮威武軍俱節度使立廟揚州賜名傳

忠宏簡錄九十八

十一月庚辰以陸秀夫參議淮東制置司事王宗沐續鑑宋紀五

十一

陸秀夫字君實楚州鹽城人李庭芝鎮淮南辟置幕中天下稱得士者以淮南為第一號小朝廷秀夫性沈靜不求人知察其事皆治庭芝益器之雖改官不

使去已就幕三遷至主管機宜文字庭芝制置淮東擢參議官德祐元年邊事急僚屬多亡者惟秀夫數人不去庭芝上其名除司農寺丞累擢至左丞相厓

山破負衛王赴海死宋史忠義傳六

十二月癸亥詔似道都督諸路軍馬以步軍指揮使孫

虎臣總統諸軍宋史瀛國公紀

德祐元年元世祖至元十二年春二月甲辰以中書右丞博魯歡

為淮南都元帥元史世祖紀五

戊子似道出師以孫虎臣為寧武軍節度使與元兵戰敗績夏貴不戰而去似道虎臣以單舸奔揚州宋史瀛國公紀

似道以精銳七萬餘人盡屬虎臣軍於池州下流之
 丁家洲夏貴以戰艦二千五百艘橫亘江中似道自
 將後軍軍魯港貴嘗失利於鄂恐督府成功無所逃
 罪又恐虎臣新進出已上殊無鬥志伯顏分步騎夾
 岸而進麾戰艦合勢衝虎臣軍命舉巨礮擊中堅虎
 臣軍動阿木以划船數千艘乘風直進呼聲動天地
 虎臣前鋒將姜才方接戰虎臣遽過其妾所乘舟眾
 見之喧曰步帥遁矣軍遂亂夏貴不戰而走似道錯
 愕失措鳴鉦收軍殺溺者不可勝計水為之赤似道
 夜駐珠金沙召貴計事貴曰惟有入揚州耳乃與虎

臣單舸奔還揚州明日潰兵蔽江而下似道使人登
 岸揚旗招之皆莫應有為惡語嫚罵之者

王宗沐續鑑宋紀五

十一

端明殿學士江淮招討使汪立信聞似道師潰扼吭卒

同上

汪立信淳祐六年進士歷知昭信軍權淮東提刑擢
 京湖安撫制置知江陵府時襄陽圍急立信移書似
 道言為今日計其策有三似道怒曰瞎賊狂言敢爾
 中以危法廢之咸淳十年元大舉伐宋似道督軍江
 上以立信為招討使俾就建康府募兵援江上諸郡

立信受詔即日入道以妻子託其將金明執其手曰
 我不負國家爾亦必不負我遂行與似道遇蕪湖似
 道拊立信背哭曰不用公言以至於此立信曰瞎賊
 今日更說得一句不似道問立信何向曰今江南無
 一寸乾淨土某去尋一片趙家地上死耳既至建康
 守兵悉潰四面皆北軍立信率所部數千人至高郵
 欲控引淮漢以為後圖已而聞似道師潰嘆曰吾今
 日猶得死於宋土也乃置酒召賓佐與訣手為表起
 居三宮與從子書屬以家事夜分起步庭中慷慨悲
 歌握拳撫案者三以是失聲三日扼吭而卒

宋史立
信本傳

舊志云字
成甫六安人

行人郝經尚留儀真元主復使禮部尚書中都海牙及
 經弟庸來問執行人之罪賈似道震恐乃遣總管段佑
 以禮送經歸宋元通鑑一百二十五元史云國信使郝經劉人傑等來歸由水路赴闕

三月丁丑知滁州王應龍以城降已丑滁人執應龍歸
 於揚州殺之

宋史瀛
國公紀

辛丑敕阿朮分兵取揚州

元史世
祖紀五

夏四月庚申元兵東下所過迎降李庭芝率勵所部固
 守揚州

王宗沐續鑑
宋紀五十一

賈似道兵潰蕪湖沿江諸郡無一人能守者庭芝率

所部城守有李虎者持招降榜入揚州庭芝誅虎焚其榜總制張俊持孟之縉書來招降庭芝焚書梟俊五人於市日調苗再成戰其南許文德戰其北姜才施忠戰其中人人爲之死門朝廷加庭芝參知政事

知樞密院事 宋史庭芝之本傳

壬戌元兵攻真州知州苗再成宗子趙孟錦帥兵大戰

於老鸛背敗績 宋史瀛國公紀

癸亥阿术師駐瓜洲距揚州四十五里宋淮東制置司

盡焚城中廬舍遷其居民而去阿术勅立樓櫓戰具以

守之 元史世祖紀五

庚午元兵至揚子橋揚州都撥發官雷大震出戰死 宋史

瀛國公紀

阿术乘勝進趨揚州姜才逆之於三里溝敗之阿术佯退才逐之阿术反戰至揚子橋大震死之兩軍夾水而陳元張宏範以十二騎絕渡衝才軍軍堅不動宏範引卻以誘之才將回躍馬出奮大刀直前向宏範宏範反轡迎刺之應手仆元立陳者歡聲震地才軍遂潰阿术與宏範追之自相蹂踐與陷濠水死者甚眾元軍進薄揚州南門 王宗沐續鑑宋紀五十一

五月丁丑阿术立木柵於揚子橋斷淮東糧道且爲瓜

洲藩蔽元史世祖紀五

六月丙寅都統姜才副將張林步騎二萬人乘夜攻揚子橋木柵守柵萬戶史弼告急阿朮自瓜洲赴之詰旦至柵下才軍夾水為陳阿朮麾騎兵渡水擊之陳堅不動阿朮軍引卻才軍來逼我軍與力戰遂走阿朮麾步騎並進才僅以身免生擒張林斬首萬八千級同上

秋七月庚午朔阿朮集行省諸翼萬戶兵船於瓜洲阿塔海董文炳集行院諸翼萬戶兵船於西津渡宋詔江淮制置使趙潛樞密都承旨張世傑知泰州孫虎臣等陳舟師於焦山南北阿朮遣張宏範等以拔都兵船千艘掠珠金沙辛未大戰自辰至午宋師大敗目是不復能軍同上

九月丙戌元兵至泰州知州孫虎臣自殺宋史瀛國公紀案知字宋史譌作和宏簡錄遂作知和州考元世祖紀二月戊辰師次采石鎮知和州王善以城降是時和州已入於元虎臣本知泰州焦山敗後仍回泰州耳

甲午姜才將步騎萬五千人攻灣頭堡阿朮阿塔海擊敗之元世祖紀五

冬十月元阿朮攻揚久而無功乃築長圍困之城申食盡死者枕藉滿道而李庭芝之志益堅會伯顏至灣頭

遂議深入王宗沐續鑑宋紀五十一

十一月戊寅阿刺罕破銀樹東壩戍將趙淮死之同上

趙淮丞相葵從子李全之叛屢立戰功累官至淮東

轉運使德祐中戍銀樹壩兵敗與其妾俱被執至瓜

洲元帥阿木使淮招李庭芝許以大官淮陽許諾至

揚城下乃大呼曰李庭芝男子死耳毋降也元帥怒

殺之棄屍江濱宋史忠義傳五案續鑑以淮為葵子誤淮妾長沙人

逸其姓名淮兵敗俘一軍校帳中乃解衣中金遺其

左右且告之曰妾夙事趙運使今其死不葬願掩埋

之當終身事公無憾軍校憐其言使如江上妾聚薪

焚淮骨置瓦缶自抱持操小舟至急流中仰天慟哭

躍水而死宋史忠義傳

癸未元兵破興化縣知縣胡拱辰自殺宋史瀛國公紀

拱辰令興化撫綏流亡甚有惠政興化縣志

德祐二年元至元十三年二月五奉使及一閣門宣贊舍人持

謝太后詔來諭才發弩射卻之復以兵擊五奉使於召

伯堡大戰而退宋史忠義六姜才傳

元人載奉使柳岳洪雷震并輜重俱北至高郵嵇家莊

統制嵇聳擊敗之柳岳死焉事見文文山集

杜潛從京口以計賂守夜劉千戶得脫天祥偕走淮甸

宋史忠義傳九時文天祥除右丞相如軍中請和為伯顏所拘雷

天祥與其客杜滸十二人夜亡入真州苗再成出迎喜且泣曰兩淮兵足以興復特二閫小隙不能合從耳天祥問計大稱善具後苗再成傳卽以書遺二制置遣使約結天祥未至時揚有脫歸兵言密遣一丞相入真州說降矣庭芝信之使再成亟殺之再成不忍給天祥出相城壘以制司文示之閉之門外久乃復遣二路分覘天祥果說降者卽殺之二路分見其忠義亦不忍殺以兵二十人導之揚四鼓抵城下聞候門者談制司下令備文丞相甚急眾相顧吐舌乃東入海道遇兵伏環堵中得免然亦飢莫能起從樵者乞得

餘糝羹行入板橋兵又至眾走伏叢篠中兵入索之執杜滸金應而去虞候張慶矢中目身被二創天祥偶不見獲滸應解所懷金與卒獲免募二樵者以贖

荷天祥至高郵泛海至温州

宋史天祥本傳案史語全本文信公自記見

文山集今附錄於後云二十九日杜架閣滸與帳前將余元慶謀至真州三月朔至城下問者告以文丞相在鎮江走脫徑來投奔城子諸將校皆出卽延入城苗守迎見語國事移時感憤流涕卽款之州治中住清邊堂然後從者始至引至直司搜身上軍器既知無他然後見信至真州三日苗守約云早食後看城子予欣然諾之有頃陸都統來導余至小西門城上聞看未幾王都統至迤運出城外王忽云有人在揚州供得丞相不好出制司小引視之乃脫回人供北中所見云有一丞相差往真州賺城子方歎惋間二都統忽鞭馬入城小西門閉矣不得復入子幸脫身至真州卽議糾帥兩淮以圖恢復制使乃疑子爲

北用欲見殺江南與北中皆知予為忠義而兩淮不
予信天地茫茫與誰語哉予在門外久之忽有二人
來曰義兵頭目張路分徐路分也予告以故二人云
安撫傳語差某二人來送看相公去那裏予云必不
得已惟有去揚州見李相公路分云且行且行良久
有五十人弓箭刀劍來隨二路分騎馬以二馬從予
子與杜架閣連轡而發予在小西門外皇皇無告杜
架閣仰天呼號幾赴濠死從者皆無人色苗守又遣
衣被包復等來還遂之揚州是日上巳日也二路分
引予行數里忽捉刀於野駐足不行二路分請下馬
云有事商量景色可駭予下馬與之立談二路分云
今日之事非苗安撫意乃制使欲殺丞相安撫不忍
加害故遣某二人送行今欲何往予云只往揚州彼
云揚州殺丞相奈何日莫管信命去二路分云安撫
令送往淮西予云淮西皆北所在無路可歸只欲見
李制使若能信我尚欲連兵以圖恢復否則即從通
州路遵海還闕二路分云安撫見辦船在岸下丞相
從江行或歸南歸北皆可予驚曰如此則安撫亦疑
我矣二路分見予辭真確乃云安撫亦疑信之間令
某二人便宜從事某見相公口口是忠臣某如何敢

殺相公既真箇去揚州某等御送去時舉所攜銀一
百五十兩與五十兵且許以至揚州二路分見予堅欲往
揚州遂復取揚州路是日行至暮二路分先辭去雷
亦辭去揚州有販鬻者以馬載物夜竊行於途曰馬
梁子門憊甚有三十郎廟僅存牆階屋無矣一行入
州西門憊甚有三十郎廟僅存牆階屋無矣一行入
皆枕藉於地時三鼓風寒露濕悽苦不可道杜架閣
以爲制臣欲殺我不如早尋一所趨高郵至通州渡
海歸江南或見二主伸報國之志徒死城下無益余
元慶引一賣柴人至云相公有福問能導至高沙否
日能日何處可暫避一日日儂家可日此去幾里如
何日看福如何耳同行通十二人行至日未決余元慶
李茂吳亮蕭發遽生叛心所懷白金各一百五十星
攜以走子不得已去揚州城下隨賣柴人趨其家天
色漸明行不能進至十五里頭半山有土圍一所舊
是民居毀蕩之餘無椽瓦其間馬糞堆積時惟恐有
望高者見一隊人行即來追逐只得入此土圍中暫

事略四

避既入土圍中四山闐然無一人影時無米可飯有
 米亦無烟火可炊懷金無救也土圍糞穢不可避但
 掃淨數尺地以所攜衣服貼視地面睡起復坐坐起
 復睡忽有數千騎隨山而行正從土圍後過一
 無復人色傍壁深坐恐門外得見若一騎入來即無
 唯類矣時門前馬足與箭筒聲歷落在耳只隔一壁
 幸而風雨大作騎徑去予與杜架閣及金應張慶夏
 仲呂武王青鄒捷共八人在土圍中時已過午謂哨
 不來山下里有一古廟廟中有丐婦居之廟前有井
 亟遣呂武鄒捷下山汲水意或可以得米菜少救飢
 餓不料哨至二人被獲二人解腰白金近三百兩悉
 以與之北受得不殺及哨過二人方回早從賣柴人
 行不能前遂至於士圍中約賣柴人入城糶米救性
 命云是日北數百騎薄西城於是門不開賣柴人竟
 不得出子等飢窘失措又以上圍中露天不可睡於
 是下山投古廟中與丐婦人同居焉既至廟中坐未
 定忽有人攜槌至良久三四人陸續來吾意不免矣
 乃知其人自城中來夜討柴來早入城赴賣無惡意
 也數人煮糝羹出其餘以遺我予見諸樵夫幸而可
 與語告以患難厚許之使導往高沙賴其欣然見從

謂此處不是高沙路方駐堡城北門賈家庄少驛一
 日卻為入城糶米買肉以救兩日之飢又雇馬辦乾
 糧以備行役於是五更隨諸樵夫往焉初五日黎明
 至賈家庄雇騎夜趨高郵越四十里至板橋迷失道
 一夕行田畝中不知東西風露滿身人馬飢乏旦行
 霧中不相辨須臾四山漸明忽隱隱見北騎道有竹
 林亟入避須臾二十餘騎遮林呼噪虞候張慶右眼
 內中一箭項二刀割其髻裸於地帳兵王青縛去杜
 架閣與金應林中不遠北馬入林過吾傍三四皆不見僕
 藏處距架閣不遠北馬入林過吾傍三四皆不見僕
 夫鄒捷臥叢篠下馬過踏其足流血總轄呂武親隨
 夏仲散避他所先是自揚州來有引路三人牽馬三
 人至是或執或逃僅存其二二人出於無聊各操樵
 相隨有無禮之志遂巡行路無可奈何至晚忽遇樵
 者數人如佛下降偶得一籬以繩維之坐於籬中雇
 六夫更迭負送馳至高郵城西天已曉不得渡常恐
 追騎奄至宿陳氏店以茅覆地忍飢而臥黎明過
 而心始安子至高沙姦細之禁甚嚴時予以羅為轎
 見者憐之又張慶血流滿面衣衫皆汚人皆知其為
 遇北不復以姦細疑然聞制使有文字報諸郡有一

丞相來賺城令覺察關防於是不敢入城急買舟夫
高郵水與灣頭通下海陵入射陽通漣水皆其路也
二月六日城子河一戰我師大捷人指某處是戰場
自至城子河積尸盈野水中流尸無數臭穢不可當
上下幾二十里乃北以二月六日載奉使柳岳洪雷
震并輜重俱北嵇家莊擊其前高郵見北說入江淮惟此
敗柳岳死焉洪雷震今在高郵方有一團人家以水
戰我師大勝自高郵至嵇家莊舉其姪昌其館客
為若統制官嵇聳其子德潤請鄉舉其姪昌其館客
莆田人林希驛字千里林孔時字願學皆銳意於事
功者稽設醴甚至云今早報灣頭馬出到城子河邊
不與之相遇公眞福人也爲之嗟嘆不置願學同德
潤送予
至泰州

閏月謝太后與帝隨元兵北行至瓜洲李庭芝與姜才
涕泣誓將士出兵奪兩宮將士皆感泣乃盡散金帛犒
兵以四萬人夜擣瓜洲戰三時猷擁帝避去才追戰至

浦子市苗再成亦謀奪駕不克宋元通鑑一百二十六

夏四月乙丑朔阿朮以宋高郵寶應嘗餽揚州遣蒙

古軍將苦徹及史弼等守之別遣都元帥孛魯歡等攻

泰州之新城元史世祖紀六

端宗景炎元年五月乙巳阿朮遣總管陳傑攻拔泰州

之新城遣萬戶烏馬兒守之以徧泰州同上案益王於五月朔卽位

丁未姜才攻灣頭堡阿里別擊走之殺其步騎四百餘

人右衛親軍千戶董士元戰死同上

戊申宋馮都統等自真州率兵二千戰船百艘襲瓜洲

阿朮遣萬戶昔里罕阿塔赤等出戰大敗之追至珠金

沙得船七十七艘馮都統等赴水死

同上案馮都統史逸其名

六月甲戌姜才夜率步騎數千趨丁村堡守將史弼苦
徹出戰斬首百餘級獲馬四十匹詰旦阿里都督陳巖
以灣頭堡兵邀其後大破之獲米五千餘石阿朮又以
高郵水路不通必由陸路餽運以千騎邀之米運果來
殺負米卒數千獲米三千石

同上

壬辰李庭芝畱朱煥守揚州與姜才率步騎五千東走
阿朮親率百餘騎督右丞阿里萬戶劉國傑分道追及
泰州西殺步卒千人庭芝等僅得入遂築長圍塹而守
之

同上

秋七月乙巳朱煥以揚州降

同上

乙卯宋泰州守將孫良臣與李庭芝帳下卒劉發鄭俊
開北門以降執李庭芝姜才繫揚州獄

同上

宋亡謝太后及瀛國公為詔諭之降庭芝登城曰奉
詔守城未聞有詔諭降也已而兩官至瓜洲復詔庭
芝庭芝不答命發弩射使者斃一人餘皆退去姜才
出兵奪兩宮不克復閉城守三月夏貴以淮西降幕
客有以言覘庭芝者庭芝曰吾惟一死而已阿朮使
者持詔來招降庭芝開壁納使者斬之焚詔俾上已
而淮安盱眙泗州皆以糧盡降庭芝猶括民間粟以

給兵粟盡令官人出粟粟又盡令將校出粟雜牛皮
 麩藁以給之兵有烹子而食者猶日出苦戰七月益
 王遣使以少保左丞相召庭芝庭芝以朱煥守揚與
 姜才將兵七千人元史作五千東至泰州煥既以城降驅
 庭芝將士妻子至泰州城下裨將孫貴胡惟孝等開
 門降庭芝聞變赴蓮池水淺不得死被執至揚州朱
 煥請曰揚自用兵以來積骸滿野皆庭芝與才所為
 不殺之何俟於是斬之死之日揚之民皆泣下宋史庭芝
本傳姜才濠州人通州副都統知兵善騎射撫士卒
 有恩至臨陳軍律凜凜賈似道出師屬孫虎臣為先

鋒虎臣軍潰才收兵入揚州大兵乘勝攻揚才為三
 壘陳逆之三里溝有功又戰楊子橋流矢貫才肩才
 拔矢揮刀而前所向辟易已而大軍築長圍自楊子
 橋竟瓜洲東北跨灣頭至黃塘西北至丁村欲以久
 困之時德祐元年也明年正月宋亡使持謝太后詔
 來諭才發弩射卻之復擊五奉使於召伯堡瀛國公
 至瓜洲才出奪之眾擁瀛國公去才進戰至浦子市
 夜猶不退阿朮使人招之才曰吾寧死豈作降將軍
 耶四月才以兵攻灣頭柵五月復攻之騎旋濇而止
 乃舍騎步戰至四鼓全師以歸揚食盡才時出運米

真州高郵以給兵六月護餉至馬家渡萬戶史弼將兵奪之才與戰達旦弼幾殆阿朮來援乃免庭芝以在圍久召才計事屏左右語久之第聞才厲聲云相公不過忍片時痛耳自是以兵護庭芝第期與俱死七月益王以保康軍承宣使召才才與庭芝東至泰州將入海阿朮以兵追及圍泰州使招之降才不聽阿朮驅揚兵士妻子至城下會才疽發脅不能戰諸將遂開門降都統曹安國入才臥內執之以獻阿朮愛其忠勇欲降而用之才肆為慢言阿朮責庭芝不降才曰不降者才也復憤憤不已阿朮怒囚之揚州

宋史忠義傳六

宋應龍為泰州諮議官泰守孫良臣之弟

舜臣自軍中來說降良臣召應龍與計應龍極陳國家恩澤君臣大義請殺舜臣以戒持二心者良臣不

得已殺之及泰州降應龍夫婦自經死

宋史李庭芝傳忠義傳

云應龍儒生通兵出入行陳三十餘年

褚一正字粹翁廬州人知高

郵軍守邊有功擢閤門宣贊舍人為提刑司諮議官

督戰被創沒水死

宏簡錄一百九十

賈純孝揚州教授受

知帥李庭芝調江淮總幕北兵下江南二王在福州

以史館檢閱召舜文天祥辟佐其幕厓山師敗抱二

女偕妻牟同赴海死

宋史忠義傳四州懷安軍人具賈子坤傳

案純孝潼

丙辰阿朮以總管烏馬兒等守泰州高郵等處相繼來

附元史世祖紀六

高貴知高郵軍時江淮已沒於元貴聞益王立於福州從海道勤王厓山兵敗赴海死之高郵州志

八月元軍入真州宋元通鑑一百二十六

揚州既破元兵攻真益急趙孟錦死焉城陷再成不

屈死王宗沐續鑑宋紀五十二苗再成舊史無傳失其家世文

天祥自鎮江亡入真州再成知州事聞之出迎泣且

喜曰兩淮雖敝足以興復特二閩不能合從耳天祥

問計安出再成曰今先約淮西兵趨建康彼必悉力

以扞乃指揮東諸將以通泰兵攻灣頭以高郵寶應

淮安兵攻揚子橋以揚州兵攻瓜步吾以舟師直擣

鎮江同日大舉灣頭揚子橋皆沿江脆兵且日夜望

我師之至攻之即下使合攻瓜步之三面吾自江中

一面薄之雖有智者不能為之謀矣瓜步既舉以東

兵入京口西兵入金陵要浙歸路其大帥可立致也

天祥大稱善即以書遣二制置會李庭芝疑阻不果

行其年加再成濠州團練使有宗室趙孟錦為揚州

都統司參議官自少不羈再成倚以為重元阿朮入

侵孟錦每戰輒當其鋒時阿朮攻益急以重艦駐江

上孟錦乘大霧襲之頃之日高霧霽元人見其兵少

逐之孟錦登舟失足溺水死城遂陷再成不屈而死

宏簡錄一百九十 案文信公至真州再成出迎與謀興復後得李制置書言信公為元說降賺城再成乃給令出城並遣二路分便宜從事是再成亦疑之也舊志再成傳乃云庭芝得書疑天祥為元人說降並疑再成舛誤殊甚今並削之

重修揚州府志卷之六十八

